

ಪೌಲನು ಕೋರಿಂಥದವರಿಗೆ ಬರೆದ ಪತ್ರಿಕೆ ಪೌಲಾನಿ ಕೋರಿಂಥಾತಲ್ಯಾನಾ ಲಿವ್‌ಲ್ಯಾಲ ದೊನ್ನ ಪತ್ರ

ವಳಕ್

ಕೋರಿಂಥ್ಯಾತ್‌ಲ್ಯಾನಾ ಲಿವ್‌ಲ್ಯಾಲ ದೊನ್ನ ಪತ್ರ ಅಪೊಸ್ತಲ್ ಜಾಲ್ಯಾಲಾ ಪೌಲ್ ಕ್ರಿಸ್ತ ಜ್ಞಲ್ಮುನ್ ಭವಭವಳ್ 55-56 ಆತ್ ಲಿವ್‌ಲ್ಯಾಲ ಹಾ 1:1 ಪೌಲಾನಿ ಕೋರಿಂಥ ಸಭೆಲಾ ಲಿವ್‌ಲ್ಯಾಲ್ಯಾ ದೊನ್ ಪತ್ರ್‌ಲ್ಯಾತ್ ಹ್ಯ ದೊನ್ನ ಪತ್ರ ಜಾಲ್ಯಾ ಪೌಲಾನಿ ಖುಬ್ ಮರೆದಿನಿ ಕೋರಿಂಥಾತಲ್ಯಾನಾ ಹ್ಯಚೆ ಮಾಗ್ಲ ಪತ್ರ ಲಿವ್ಲ ಹುತ್ತ್ ಮನ್ವುನ್ ವಿದ್ವಾಂಸ್ ಇಸ್ವಾಸ್ ಥೆವ್‌ತ್ಯಾತ್ 2:3-4 ವಚನಾತ್ ಲಿವ್‌ಲ್ಯಾ ಶಾರ್ಕ್ ತ್ಯ ಪತ್ರ ಕಚಾಸ್ ಅನುಕುಲಾನಿ ಆಮ್ಚಿಪ ನಾಹಿ. ಕೋರಿಂಥಾತಲ್ಯಾನಾ ಲಿವ್‌ಲ್ಯಾಲ ದೊನ್ನ ಪತ್ರ ಖುಬ್ ಕರುನ್ ಪೌಲಾನಿ ಮೆಸೆದೊನಿಯಾತ್ ಆಸ್ತಾನಾ ಲಿವ್‌ಲ್ಯಾ 2:13

ಕೋರಿಂಥ್ಯಾತ್‌ಲ್ಯಾನಾ ಲಿವ್‌ಲ್ಯಾಲ ದೊನ್ನ ಪತ್ರ ವಿಶೆಶ್ ಕರುನ್ ಖುಬ್ ವಯಕ್ತಿಕ್ ಆನಿ ಬಾವನನಿ ಬರ್ಲ್ಯಾಲ ಪತ್ರ ಜಾಲ್ಯಾ ಪೌಲ್ ಕೋರಿಂಥ ಸಭೆಚೆ ಗುಪ್ತಿತ್ ತೀತಾಪ್ಪಿ ಗೆತಲ್ಯಾಲಿ ಚಾಂಗ್ಲೆ ವರದಿಚೆ ಗುಪ್ತಿತ್ ಖುಬ್ ಆನಂದ್ ಗೆಥೊ. ಹ್ಯಾ ಪತ್ರ್‌ಲ್ಯಾತ್ ನವ್ಯಾ ಕರಾರಾಲಾ ಆದಾರ್ ವ್ಹಪುನ್ ಆಸ್‌ಲ್ಯಾಲ ವಿವರನ್ ಸಿಕ್ತಿಪ್ಪ ಆಮಿ ಬಗ್ತಾವ್. ವಿಶೆಶ್ ಕರುನ್ ಪೌಲ್ ಯೇರುಸಲೇಮ್ ಇಸ್ವಾಸಿನಾ ಮಜ್ಜತ್ ವ್ಹಯಾಸಾಟಿ ಪೈಸ ಗೊಳಾ ಕರಾಚೆ ಗುಪ್ತಿತ್ ಮಾರ್ಗ ದರ್ಶನ್ ದೆತೊ 8—9 ಹಿತ್ತ್ ಥೊಡ್ ಲಬಾಡ್ ಅಪೊಸ್ತಲ್ ಸಭೆಚೆ ಬಾಹಿರ್ ಥೊಡ್ಯಾ ಲೊಕಾಂಚ್ ವವ್ಯಾಳ್ ಉಪೇಗ್ ಕರುನ್ ಆಪ್‌ಲ್ಯಾನಾ ಪೌಲಾಚ್ ವಿರೊದಿ ಮನ್ವುನ್ ಬಗಿತಿತ. ತ್ಯಂಚಾನಿ ಪೌಲಾಚಾ ಅಧಿಕಾರ್‌ಲ್ಯಾವ ಸಂಸೆವ್ ಕೆಲಾ ದೊನ್ನ ಕೋರಿಂಥ್ಯಾಲಾ ಲಿವ್‌ಲ್ಯಾಲ್ಯಾ ಪತ್ರ್‌ಲ್ಯಾಚಾ ಸರ್ತ್ಯಾಲಾ ತ್ಯೊ ಯೇಸು

ಕ್ರಿಸ್ತಾಚಾ ಯಕಾ ಅಪೊಸ್ತಲಾಚಾ ಅಧಿಕಾರ್ ಗೆತ್ಲಾ ಮನ್ನನ್ ತ್ಯೊ ಹಾಕ್ ಖುಬ್ ಬಳಾನಿ ಹಾ ತ್ಯಚೆ ಗುಶ್ಟಿತ್ ಸಾಕ್ಷಿ ದಿಯಿತ.

ಪಿರಿಕೆ

1. ಪೌಲ್ ಸಭೆಲಾ ವಂದನ್ ಕರಿತ್ ಆಪ್ಲ ಪತ್ರ ಸುರ್ವಾತ್ ಕರ್ತೊ 1:1-7
2. ನಂತರ್ ಪೌಲಾನಿ ಆಪ್ಲ್ಯಾ ಜಾನ್ಯಾಚೆ ಯೆಜನೆತ್ ಜಾಲ್ಯಾಲೆ ಬದಲಾವನೆಚೆ ಗುಶ್ಟಿತ್ ಆನಿ ತ್ಯಚಾ ಮಾಗ್ಲ್ಯಾ ಪತ್ರ್ಯಾಲಾ ತೀ ದೆತ್ಯಾಲ್ಯಾ ಪ್ರಭಾವಾಚೆ ಗುಶ್ಟಿತ್ ಬೊಲೊ. 1:8—7:16
3. ನಂತರ್ ಪೌಲಾನಿ ಯೇರುಸಲೆಮಿತ್ಲ್ಯಾ ಇಸ್ವಾಸಿನಾ ಮಜತ್ ವ್ಹಯಾ ಪೈಸ್ ಯಕ್ ಕರಾಚೆ ಗುಶ್ಟಿತ್ ಮಾರ್ಗ ದರ್ಶನ್ ದೆತೊ 8:1—9:15.
4. ಸರ್ತ್ಯಾಲಾ ಪೌಲಾನಿ ಆಪ್ಲ್ಯಾ ಅಪೊಸ್ತಲಾಚೆ ಗುಶ್ಟಿತ್ ಲಿವ್ಲೊ. ಆನಿ ಆಪ್ಲಿ ಮುರ್ಲೆ ಭೆಟಿಚೆ ಗುಶ್ಟಿತ್ ಹುಶಾರ್ಕಿ ದೆತೊ 10:1—13:10

¹ ದೇವಾಚಾ ಮನಾಚೆಗತ್ ಕ್ರಿಸ್ತ ಯೇಸುಚಾ ಅಪೊಸ್ತಲ್ ಜಾಲ್ಯಾಲಾ ಪೌಲ್ ಆಮಚಾ ಭಾಹು ಜಾಲ್ಯಾಲಾ ತಿಮೊಥೆ ಕೊರಿಂಥಾತ್ ಆಸ್ಲ್ಯಾಲ್ಯಾ ದೇವಾಚೆ ಸಭೆತ್ಲ್ಯಾನಾ ಅಖಾಯಾ ಸೀಮತ್ ಆಸ್ಲ್ಯಾಲ್ಯಾ ದೇವಾಚಾ ಸಗ್ಳ್ಯಾ ಲೊಕಾನಾ ಲಿವಾಚ್ ಕ್ಯಾ ಮಂಜೆ,

² ಆಮ್ಚಾ ಬಾ ದೇವಾಪ್ಲಿ ಪ್ರಭು ಯೇಸು ಕ್ರಿಸ್ತಾಪ್ಲಿ ತುಮಾನಾ ಕ್ರಪಾ ಥಂಡ್ಪನ್ ವ್ಹವುನಿ.

ಪೌಲಾನಿ ದೇವಾಲಾ ದನ್ಯಾವಾದ್ ಸಾಂಗ್ಲ್ಯಾಲಾ

³ ಆಮ್ಚಾ ಪ್ರಭು ಯೇಸು ಕ್ರಿಸ್ತಾಚಾ ಬಾ ದೇವ್ ಜಾಲ್ಯಾಲ್ಯಾಲಾ ಸೊತ್ತ ವ್ಹವುನಿ. ತ್ಯೊ ದಯಾ ಆಸ್ಸಾರಾ ಬಾ ಸಗ್ಳೆ ತರನಿ ಸಮಾಪ್ತ್ಯಾಲಾ ದೇವ್ ಜಾಲ್ಯಾ

⁴ ಆಮಾನಾ ಆಲ್ಯಾಲ್ಯಾ ಸಗ್ಳ್ಯಾ ತರಾಸಾತ್ಲಿ ಆಮಾನಾ ಸಮಾಪ್ತೊ. ಆಸ ದೇವಾಪ್ಲಿ ಆಮಾನಾ ಗಾವ್ಸಾರ್ಯಾ ಆದಾರಾಸ್ ಲಾಗುನ್ ಆಮೀ

ಮಿಬ್ ತರಚಾ ತರಾಸಾತ್ ಗಾವುನ್ ಪಡ್‌ಲ್ಯಾಲ್ಯಾನಾ ಸಮ್ಜಾವ್ನಾರಿ ಜಾಲ್ಯಾವ್.

⁵ ಕಾ ಮಂಜೆ ಕ್ರಿಸ್ತಾಸ್ ಲಾಗುನ್ ತರಾಸ್ ಕಸಾ ಮಿಬ್ ವ್ಹತೊ ತಸಾಸ್ ಕ್ರಿಸ್ತಾಸ್ ಲಾಗುನ್ ಮಿಬ್ ಆದಾರ್ ಆಮಾನಾ ಗಾವ್ತೊ.

⁶ ಆಮೀ ತರಾಸ್ ಖಾತ್ಯಾವ್ ಮನ್ವನ್ ತುಮಾನಾ ಆದಾರ್ ರಕ್ಷನ್ ಗಾವ್ತಾರ್. ಆಮಿ ಸಮಾಧಾನಾನಿ ರಾಯ್‌ಲ್ಯಾವ ತ್ಯನಿ ತುಮಾನಾ ಆದಾರ್ ವ್ಹತ್ತೊ. ಆಮಿ ಖಾನಾರಾ ತರಾಸ್ ತುಮಿ ಥಂಡ್ವನಾನಿ ಸುಸ್ವನ್ ಗಿಹ್ಯಾಸಾಟಿ ತ್ಯತುಮಾನಾ ಧೀರ್ ದೆತ.

⁷ ತುಮಿ ತರಾಸಾತ್ ಆಮಿ ಸಂಗ ಹಾಸಾ ತಸಸ್ ಆದಾರಾತ್ಪಿ ಹಾಸಾ ಮನ್ವನ್ ಆಮಾನಾ ಸಮಾಜಲ್ಯಾಲ್ಯಾನಿ ತುಮ್ಚೆ ಗುಶ್ಟಿತ್ ಆಮಾನಾ ಆಸಲ್ಯಾಲಿ ಆಶಾ ಘಟ್ ಹಾ.

⁸ ಮಾಯೆಚಾ ಬನ್ವಿ ಬಾವ್ತಾನು, ಆಶಾ ಸೀಮತ್ ಆಮಿ ಖಾಲ್ಯಾಲಾ ಕಷ್ಟ ತರಾಸ್ ತುಮಾನಾ ಸಮಜುಂತ ಮನ್ವನ್ ಮೀ ಯವಸ್ತೊ. ತಿಥ ಆಮ್ಚೆ ತಾಕ್ತಿಚೆ ವೈಲಾ ತರಾಸ್ ಖಾವುನ್ ಆಮಿ ಪಡುನ್ ಜೀವ್ನಾ ಕರಾಚಿ ಆಶಾಸ್ ನಾಹಿ ಜಾಲೆ.

⁹ ಮರ್ನಾರ್ ಮನ್ವನ್ ಖಾತ್ರಿ ಜಾಲಿತವಾ ಆಮಿ ಆಮಿವ ಇಸ್ವಾಸ್ ಥೆವಾಚೆ ಆಂದಿ ಮೆಲ್ಯಾಲ್ಯಾನಾ ಉಟೆವತ್ಯಾಲ್ಯಾ ದೆವಾವ ಇಸ್ವಾಸ್ ಥೆವಾಯಾವ್ತಾಯಿ ಮನ್ವನ್ ಹ್ಯಸಗ್ಳು ಘಡ್ಲೆ.

¹⁰ ತ್ಯನಿ ಆಮಾನಾ ತಸ್‌ಲ್ಯಾ ಭ್ಯಾಚಾ ಮರ್ನಾತ್ಪಿ ಚುಕಿವ್ಲೆ. ಮೊರ್ಹ ಕವಾಬಿ ಚುಕಿವ್ನಾರ್. ತುಮಿ ಆಮಿ ಸಾಟಿ ಮಾಗ್ನ ಕರ್ತ್ಯಾಲ್ಯಾಸ್ ಲಾಗುನ್ ಹಿತ್ರಿ ಮೊರ್ಹಬಿ ಚುಕಿವ್ನಾರ್ ಮನ್ವನ್ ತ್ಯಚಿವ ಆಶಾ ಥೆವ್ನಾರಿ,

¹¹ ಜಾಲ್ಯಾವ್ ಆಸಸ್ ಮಿಬ್ ಜನಾಂಚಾ ಮಾಗ್‌ನ್ಯಾನಿ ಆಮಾನಾ ಗಾವ್ನಾರ್ ಉಪಕಾರಾಸಾಟಿ ಆಮಿವ್ ಲಾಗುನ್ ಮಿಬಜನಾಂಚಿಪ್ಪಿ ದೇವಾಲಾ ಕ್ರತಜ್ಞತಾ ಸ್ತುತಿ ವ್ಹನಾರ್.

ಪೌಲಾಚಾ ಪ್ರಯಾನಾಚಾ ಯವಜ್ಞಾಚೆ ಬದಾಲ್ವ

¹² ಆಮಿ ನಿಸ್ತ ಮಾನ್ವಾಚೆ ಗಿನ್ಯಾನ್ ವಾಪ್ರಾಚೆ ಆಂದಿ ದೇವಾಚೆ ಕ್ರಪೆಚಾ ಆದಾರ್ ಕರುನ್ ನಿರ್ಮಳ್ ವ್ಹಪುನ್ ನೀಯತಿಚಿ ವ್ಹಪುನ್ ಹ್ಯೆ

ದುನೆತ್ ಆಂದಿಕರುನ್ ತುಮ್ಮೆ ಗುಶ್ಚಿತ್ ಚಾಲ್ಯಾವ್ ಮನ್ವುನ್ ಆಮಚ್ ಮನುಸ್ ಸಾಂಗ್ತೆ ಹಿಸ್ ಆಮಾನಾ ಆಸ್‌ಲ್ಯಾಲಿ ಮರ್ಯಾದ್.

13 ತುಮಿ ಆಮ್ಚಾ ಪತ್ರ್ಯಾತ್ ವಾಚ್ಪುನ್ ಸಮಜುನ್ ಗೆತಲ್ಯಾಲ್ಯಾ ಖನ್ನತಿ ಸುಡುನ್ ದುಸ್‌ರ್ಯಾ ಕಸ್‌ಲ್ಯಾಸ್ ಮೀ ತುಮಾನಾ ಲಿವ್‌ಲ್ಯಾ ನಾಹಿತಾ. ಸರ್ತ್ಯಾ ಪರತ್ ತುಮಿ ಸಮಜುನ್ ಗೆನ್ನಾರ್ ಮನ್ವುನ್ ಮಾಜಿ ಆಶಾ.

14 ತುಮಿ ಆಮಾನಾ ಭರಾ ಸಮಜುನ್ ಗೆತ್ಲಸಾ ಮನ್ವುನ್ ಸೆವಟ್ಟರೆತ್ ಹು ಮಂಸಿಲಾ ಮನ್ವುನ್, ಆಮಚಾ ಪ್ರಭು ಜಾಲ್ಯಾಲಾ ಯೇಸು ದಿಸ್ತಾರ್ಯಾ ದಿಸಾತ್ ತುಮಿ ಆಮ್ಚೆ ಮರೆದಿಲಾ ಕಾರನ್ ಜಾಲ್ಯಾಚೆಗತ್ ಆಮಿ ತುಮ್ಮೆ ಮರೆದಿಲಾ ಕಾರನ್ ವ್ಹಸಿಲಾ ಮನ್ವುನ್ ತುಮಿ ಹು ಮನ್ವಾರ್.

15 ಹ್ಯಾ ಇಸ್ವಾಸಾತ್ ಬಳ್ಕಾಟುನ್ ಮೀ ತುಮ್ಮಿಪ ಯತ್ಯಾಲ್ಯಾಸ್ ಲಾಗುನ್ ಆನಿ ಯಂಗ್ಡಾ ತುಮಾನಾ ಆಶೀರ್ವಾದಾಚಾ ಪ್ಯಾಯ್ದಾ ಗಾವಲ್ ಮನ್ವುನ್ ಯವಸ್ತೊ.

16 ಆಂದಿ ತುಮ್ಮಿಪ ಯವುನ್ ತುಮ್ಮೆ ವಾಟಿನಿ ಮಕೆದೊನ್ಯಾತ್ ಜಾವುನ್ ನಂತರ್ ಮಕೆದೊನ್ಯ ಸುಡುನ್ ಪರ್ತುನ್ ತುಮ್ಮಿಪ ಯವುನ್ ತುಮಿ ಮನಾ ಯುದಾಯಾತ್ ಲಾವುನ್ ದಿಯಾವ್ಹಯಿಸಾ ಮನ್ವುನ್ ಯವಸ್ತೊ.

17 ಆಸ ಯವಜ್ಜ ಮನ್ವುನ್ ಮೀ ಚಂಚಳ್ ಮನಾಚಾ ಜಾಲ್ಯೊ ಕ್ಯಾ? ನಿಸ್ತ ಲೊಕಾತ್ಲ ತ್ಯವ್ಹಸ್ ಯವಜುನ್ “ಹೆ” ಗಟ್ಟಿಲಾ ವ್ಹಯ್ ನಂತರಚೆ ಗಟ್ಟಿಲಾ “ನಾಹಿ” ಮನ್ವುನ್ ಸಾಂಗ್ತಾರ್ಯಾಚೆಗತ್ ಜಾಲ್ಯೊ ಕ್ಯಾ? ಕಂದಿಸ್ತಾಹಿ.

18 ದೇವ್ ಇಸ್ವಾಸಾಚಾ ಹಾ ತಸಸ್ ಆಮಿ ತುಮಾನಾ ಸಾಂಗಲ್ಯಾಲಿ ಬುಲಿ ಯಂಗ್ಡಾವ್ಹಯ್ ಮನ್ವುನ್ ಆನಿ ಯಂಗ್ಡಾ ನಾಹಿ ಮನ್ವಾಯಾ ಶಕ್ಯಾ ನಾಹಿ. ತ್ಯಲಾ ಇಸ್ವಾಸಾಚಾ ದೇವುಸ್ ವಳಕ್ ಜಾಲ್ಯಾ.

19 ಮೀ ಸಿಲ್ವಾನ್, ತಿಮೊತ್ಯಾ ಸಗ್ಳು ತುಮ್ಮಿಪ ಪ್ರಚಾರ್ ಸಾಂಗ್‌ಲ್ಯಾಲ್ಯಾ ದೇವಾಚಾ ಲೈಕ್ ಜಾಲ್ಯಾಲ್ಯಾ ಯೇಸು ಕ್ರಿಸ್ತ ಹೆ ಗಟ್ಟಿಲಾ ವ್ಹಯ್ ನಂತರ್ಚಿ ನಾಹಿ ಮನ್ವುನ್ ಸಾಂಗ್ತಾರ್ ನವ್ವತ್ಯಚಿಪ ವ್ಹಯ್ ಮನ್ವಾಚೆಸ್ ಕವಾಬಿ ಹಾ.

20 ಮನ್ವನ್ ದೇವಾನಿ ದಿಲ್ಯಾಲಾ ಸಬ್ಬ ಸಗ್ಗ ಕ್ರಿಸ್ತಾಪ ವ್ಹಯ್ ಮನ್ವಾಚ್ಚಸ್ ಜಾಲ್ಯಾತ. ಆಮ್ಚಿಸ್ ಲಾಗುನ್ ದೇವಾಲಾ ಮೈಮಾ ಗಾವಾಯಾವ್ಹಯಿ ಮನ್ವನ್ ತ್ಯಚಿಸ್ ಲಾಗುನ್ ಆಮಿ ತಸಸ್ ವ್ಹವುನಿ ಮನ್ವನ್ ಸಾಂಗ್ತಾವ್.

21 ಆಮಾನಾ ಅಭಿಶೆಕ್ ಕರುನ್ ಕ್ರಿಸ್ತಾಚೆ ಯಕಿತ್ ನಿವ್ವನ್ ಆಮಾನಾ ತುಮ್ಮಿ ಸಂಗ ಘಟ್ ಕರ್ನಾರಾ ದೇವುಸ್.

22 ತ್ಯನಿ ಆಮ್ಚಿವ ಆಪ್ಲಾ ಸಿಖಾ ಮಾರುನ್ ಆಮ್ಚಾ ಮನಾತ್ಪಿ ಪವಿತ್ರಾತ್ಮಾಲಾ ಆಂದಿಸ್ ಖಾತ್ರಿ ದಿಲ್ಲಿ.

23 ತುಮಿ ಮಾಜೆ ಸಿಕ್ಲೆತ್ಪಿ ಚುಕುನ್ ಗಿಹ್ಯಾವ್ಹಯಿಸಾ ಮನ್ವನ್ ಮೀ ಆಙ್ಕುನ್ವರೆತ್ ಕೊರಿಂಥಾತ್ ಆಲೊ ನಾಹಿ ಹ್ಯ ಮನಾಪಸುನ್ ಸಾಂಗ್ತೊ. ಹ್ಯಲಾ ದೇವುಸ್ ವಳಕ್.

24 ತುಮ್ಮಾ ಇಸ್ವಾಸಾಚೆ ಗುಶ್ಟಿತ್ಪಿ ಆಮಿ ತುಮ್ಮಿವ ಹುಕುಮ್ ಚಾಲ್ಲ್ಯಾಚಾ ಮನ್ವನ್ ನವ್ವ. ತುಮಿ ಇಸ್ವಾಸಾತ್ ಬಳ್ಕಾಟ್ಲ್ಯಾಸಾ ಮನ್ವನ್ ತುಮಚಾ ಸಂತೊಶಾಲಾ ಆಮಿ ಜುಡಿದಾರ್ ಜಾಲ್ಯಾವ್ ತ್ಯವ್ಹಸ್.

2

1 ಆನಿ ಯಂಗ್ಡಾ ತುಮ್ಮಿಪ ಯವುನ್, ತುಮಿ ತರಾಸಾತ್ ಗಾಹುನಾಹಿಸಾ ಮನ್ವನ್ ಮೀ ನಿರ್ದಾರ್ ಕೆಲಾ.

2 ಮೀಸ್ ತುಮನಾ ತರಾಸ್ ದಿಲಾತ, ಮನಾ ಸಂತೊಶ್ ಕರ್ತ್ಯಾಲ ಕೊನ್? ಮಾಜಿಪ್ಪಿ ತರಾಸಾತ್ ಗಾವಲ್ಯಾಲಿ ತುಮಿಸ್ ನವ್ಹಾ ಕ್ಯಾ?

3 ತ್ಯಚಿಸ್ ಲಾಗುನ್ ಮೀ ತ್ಯ ಪತ್ರ ಲಿವ್ಲ್ಯಾಲ: ಮನಾ ಸಂತೊಸ್ ಕರ್ನಾರ್ಚ್ಯಾಂಚಾನಿಸ್ ಮನಾ ತರಾಸಾತ್ ಗಾಲುನಾಹಿ ಮನ್ವನ್ ಮೀ ಆಲೊ ನಾಹಿ. ಮಾಜಾ ಸಂತೊಸುಸ್ ತುಮಚಾ ಸಗ್ಳ್ಯಾಂಚಾ ಸಂತೊಸ್ ಮನ್ವನ್ ತುಮಿ ಮನ್ನಿಲಾ ಮನ್ವನ್ ಇಸ್ವಾಸ್ ಕೆಲಾ.

4 ತುಮ್ಮಿವ ಮನಾ ಆಸಲ್ಯಾಲಿ ಖುಬ್ ಮಾಯಾ ತುಮಿ ಸಮಜುನ್ ಗಿಹ್ಯಾವ್ಹಯಿಸಾ ಮನ್ವನ್ ಮೀ ಖುಬ್ ರಡತ್ ಮನಾತ್ಲ್ಯಾ ತರಾಸಾನಿ ದುಖಾನಿ ತುಮಾನಾ ಲಿವಲ್ಯಾಖರ ತುಮಾನಾ ದುಖ್ವಾಯಾ ಸಾಟಿ ನವ್ವ.

ವಾದಿಂಚೆಸಾಟಿ ಮಾಪಿಚೆ ಮಾಗ್ನ್

5 ಮನಾ ಬೆಜಾರ್ ಕೆಲ್ಯಾಲಾ ಯೊಕ್ ತುಮ್ಮಿಪ ಆಸ್ಲಾತ ತ್ಯನಿ ಮನಾ ತ್ಯವ್ನ್ ದುಖ್ವಾಚೆ ಆಂದಿ ತುಮ್ಮಾತ್ ಖುಬ್ ಲೊಕಾನಾ ದುಖಿವಲ್ಯಾತ ತ್ಯ ದುಖ್ ಸಗಲ್ಯಾನಾ ಭಾಲ್ಯಾ ಮನ್ವನ್ ಮೀ ಸಾಂಗಿತ್ನಾಹಿ.

6 ಆಸ್ಲಾಲ್ಯಾ ತುಮ್ಮಿಪ್ಲ್ಯಾ ಖುಬ್ ಲೊಕಾಂಚ್ಯಾಪ್ಲಿ ಗಾವಲ್ಯಾಲಿ ತೀ ಸಿಕ್ವೆಸ್ ಪುರೊ.

7 ಆಭುನ್ ತ್ಯಲಾ ಸಿಕ್ವಾ ದಿಯಾಚೆ ಆಂದಿ ಮಾಪ್ಕರಾ, ಸಮ್ಜಾವಾ ನಾಹಿತ ತ್ಯೊ ಖುಬ್ ದುಖಾತುಸ್ ರಾನ್ಹಾರ್.

8 ಮನ್ವನ್ ತ್ಯಲಾ ತುಮ್ಮಿ ಮಾಯಾ ದಾವಾಯಾ ವ್ಹಯಿಸಾ ಮನ್ವನ್ ತುಮ್ಮಿಪ ಮಾಕ್ಲೊ.

9 ಸಗಲ್ಯಾ ಗುಶ್ಟಿ ಪ್ಯಾಳ್ತ್ಯಾಸಾ ಕ್ಯಾ ನಾಹಿ ಮನ್ವನ್ ತುಮ್ಮಾ ಗುನಾಚಿ ಪಾರಕ್ ಕರುನ್ ಸಮಜುನ್ ಗಿಹ್ಯಾ ವ್ಹಯಿ ಮನ್ವನ್ ಆಸ ಲಿವ್ಲ.

10 ತುಮಿ ಕುನಾಲಾ ಮಾಪಿ ಕರ್ತಾಸಾ. ಮೀ ಸಾಹಿತ್ ತ್ಯಲಾ ಮಾಪಿ ಕರ್ತೊ. ಯಕಯಳಿ ತುಮ್ಮಾತ್ಲ್ಯಾ ಕುನಾಲಾತರಿ ಮಾಪ್ ಕೆಲ್ಯಾಲ ಆಸ್ಲತ ಆನಿ ಕ್ರಿಸ್ತಾಪ ಮಾಪಿ ಕೆಲೆ.

11 ಸೈತಾನಾನಿ ಆಮಚಾ ಮೊಸ್ ಕರುನಾಹಿ ಮನ್ವನ್ ಆಸ ಕೆಲ. ತ್ಯಚಿ ಪಾರಕ್ ಸಗ್ಳಿ ಆಮಿ ಚಾಂಗ್ಲಿ ಸಮಜುನ್ ಗೆತ್ಲೆ ನವ್ವ.

ತ್ರೊವಾತ್ ಪಾಲಾಚಿ ಚಿಂತಾ

12 ದೇವಾನಿ ಮಾಜಿ ಸಾಟಿ ಅವ್ಕಾಶ್ ದಿಲಾ ಮನ್ವನ್ ಯವಜುನ್ ಕ್ರಿಸ್ತಾಚಿ ಬರಿ ಖಬರ್ ಸಾಂಗಾಯಾ ಸಾಟಿ ಮೀ ತ್ರೊವ ಪೆರತ್ ಆಲೊ.

13 ಫನ್ ಮಾಜಾ ಭಾಹು ತೀತ್ ಮನಾ ತಿಥ್ ಗಾವ್ಲಾ ನಾಹಿ ಮನ್ವನ್ ಮಾಜಾ ಮನಾಲಾ ಸಮಾಧಾನ್ ನಸ್ತಾನಾ ತಿಥ್ ಆಸ್ಲಾಲ್ಯಾನಾ ಜಾವುನ್ ಯತೊ ಮನ್ವನ್ ಸಾಂಗುನ್ ತಿಥ್ಲಿ ನಿಗುನ್ ಮಕೆದೊನ್ಯಾತ್ ಆಲೊ.

ಕ್ರಿಸ್ತಾಪ್ಲಿ ಜೀತ್

14 ಕ್ರಿಸ್ತಾಪ್ಪಿ ಆಮಾನಾ ಜೀತ್‌ಲ್ಯಾಲೆ ಮೆರವನಿಗಿತ್ ಭಾಲಿವೊ ಆನಿ ಕ್ರಿಸ್ತಾಚಿ ಗಿನ್ಯಾನ್ ಆಪ್ಪಿಚಿ ಚಾಂಗಲ್ಯಾ ವಾಸಾಚೆಗತ್ ಸಗ್ಳಿಕ್ ಪಗಾಳ್ಕಾಲ್ಯಾ ದೇವಾಲಾ ಸ್ತೊತ್ರ ವ್ಹವುನಿ.

15 ರಕ್ಷನಾಚೆ ವಾಟವ ಆಸ್‌ಲ್ಯಾಲ್ಯಾನಾ ಆನಿ ನಾಶಾಡಿಚೆ ವಾಟವ ಆಸ್‌ಲ್ಯಾಲ್ಯಾನಾ ಆಮಿ ದೇವಾಚಾ ಕ್ರಿಸ್ತಾಚಾ ಚಾಂಗ್ಲಾವಾಸ್ ಜಾಲ್ಯಾವ್.

16 ನಾಶಾಡಿಚೆ ವಾಟವ ಆಸ್‌ಲ್ಯಾಲ್ಯಾನಾ ಮರ್ನಾಚಾ ವಾಸ್; ರಕ್ಷನಾಚೆ ವಾಟವ ಆಸ್‌ಲ್ಯಾಲ್ಯಾನಾ ಜೀವಾಚಾ ಚಾಂಗ್ಲಾವಾಸ್ ಆಸ್‌ಲ್ಯಾ ಕಾಮಾಲಾ ಕೊನ್ ಲಾಯಿಕ್?

17 ಕಿತಿತರಿ ಲೊಕ ದೇವಾಚಿ ವಾಕ್ಯಾ ಲಬಾಡ್ ಸಾಂಗುನ್ ಯವಾರ್ ಕರ್ತಾತ. ಆಮಿ ತಸ ನವ್ವ; ದೇವಾನಿಸ್ ನಿವ್ವನ್, ದೇವಾಚೆ ಮೊರ್ಹ, ಯೇಸು ಕ್ರಿಸ್ತಾಚೆ ಯಕಿತ್ ಆಮಿ ಖರತ್ಯಸ್ ಸಾಂಗ್ತಾರ.

3

ನವ್ಯಾ ಕರಾರಾಚಿ ಸೇವಕ್

1 ಆಮಾನಾಸ್ ಆಮಿ ಆನಿಕ್ ವವ್ಯಾಳುನ್ ಗೆತಾವ್ ಕ್ಯಾ? ನಾಹಿತ ಥೊಡ್ಯಾನಾ ವ್ಹಯಿ ತಸ್ಲ ತುಮಾನಾ ದಾವಿಶಾರ್ಕ್ ಯೊಗೆತಾ ಪತ್ರ ಆಮಾನಾ ವ್ಹಯಿತ ಕ್ಯಾ? ನಾಹಿತ ತಸ್ಲಿ ಪತ್ರಿ ತುಪ್ಪಿಪ್ಪಿ ಗಿಹ್ಯಾವ್ಹಯಿತ ಕ್ಯಾ?

2 ಸ್ವತಾ “ತುಮಿಸ್ ಆಮಚಿ ಪ್ರಮಾನಾಚಿ ಪತ್ರ ತ್ಯ ಆಮ್ಚಾ ಮನಾತ್ಸಿಸ್ ಲಿವ್‌ಲ್ಯಾ ತ್ಯ ಪತ್ರ ಸಗ್ಳಾಳ್ಯಾನಾ ರಾವ ಹಾ ಸಗ್ಳಿ ವಾಚಿವ್‌ತ್ಯಾತ.

3 ತುಮಿ, ಆಮ್ಚೆ ಸೇವೆಚೆ ಫಳ್ ವ್ಹವುನ್ ಕ್ರಿಸ್ತಾಲಾ ಆಮ್ಚಾ ಹಾತಾತ್ಲಿ ಲಿವುನ್ ದಿಲ್ಯಾಲ ಪತ್ರ ಜಾಲ್ಯಾಸಾ ಮನ್ವುನ್ ದಾವುನ್ ದಿಲ್ಯಾಸಾ ತ್ಯ ಸಾಯಿನಿ ಲಿವ್‌ಲ್ಯಾಲ ನವ್ವ ಜೀವ್ ಆಸ್ತಾರ್ಲ್ಯಾ ದೇವಾಚಾ ಆತ್ಮಾನಿಸ್ ಲಿವ್‌ಲ್ಯಾಲ. ದೊಂಡ್ಯಾಚೆ ಫಳಿವ ಮಾನ್ವಾಚೆ ಶಾತಿವ ಲಿವ್‌ಲ್ಯಾ.

4 ಆಮಾನಾ ಆಸ್ಲಾ ಇಸ್ವಾಸ್ ಕ್ರಿಸ್ತಾಸ್ ಲಾಗುನ್ ದೇವಾಪ ಹಾ.

5 ತುಪ್ಪಿಪ್ಪಿಸ್ ಕಾಯ್ತರಿ ಗಡ್ಲ ಮನ್ವುನ್ ನಿರ್ಧಾರ್ ಕರಾಯಾ ಆಮಾನಾಸ್ ಆಮಿ ಚಾಂಗ್ಲಿ ನವ್ವ ಆಮಾನಾ ಆಸ್‌ಲ್ಯಾಲಿ ಬಳ ದೇವಾಪ್ಪಿಸ್ ಆಲ್ಯಾಲಿ.

6 ತ್ಯನಿ ನವ್ಯಾ ಕರಾರಾಲಾ ಸೇವಕ್ ಜಾಲ್ಯಾಲ ಬಳ್ ಆಮಾನಾ ದಿಲ್ಯಾ ಹ್ಯೊ ಕರಾರ್ ಲಿವ್‌ಲ್ಯಾಶಾರ್ಕ್ ನವ್ವ ದೇವಾಚಾ ಆತ್‌ಮ್ಯಾಚೆಗತ್ ಜಾಲ್ಯಾ ಲಿವ್‌ಲ್ಯಾಲಾ ಕರಾರ್ ಮರಾನ್ ಆನ್ತ. ದೇವಾಚಾ ಆತ್‌ಮ್ಯಾಲಾ ಮಿಳುನ್ ಆಸ್‌ಲ್ಯಾಲಾ ಜೀವ್ ದೆತ.

7 ಮರಾನ್ ಆಂತ್ಯಾಲಿ ಅಕ್ಷಾರ ದೊಂಡ್ಯಾವ ತ್ಯಾಸ್‌ಲ್ಯಾಲಿ ಆಸ್ತಿತ ಮೈಮೆನಿ ಬರ್ಲ್ಯಾಲಿ ಜಾಲ್ಯಾತ. ತ್ಯೆ ಮೈಮೆನಿ ಮೊಶೆಚಾ ತೊಂಡಾವ ಆಲ್ಯಾಲಿ ಮೈಮಾ ಕಮ್ಮಿ ವ್ಹಯಿತ್ ಆಲಿ ತರಿ ತ್ಯೆ ಮೈಮೆನಿ ತ್ಯಚ್ ತ್ವಾಂಡ್ ನದಾರ್ ಥಿವುನ್ ಬಗಾಯಾ ಇಸ್ರಾಯೇಲಾನಾ ಜಾಲ ನಾಹಿ.

8 ಆಸ ಆಸ್ತಾನಾ ದೇವಾಚಾ ಆತ್‌ಮ್ಯಾಲಾ ವ್ಹಯಿ ಜಾಲ್ಯಾಲಿ ಹೀ ಸೇವೆ ಆನಿ ಇತ್ಲಿ ಮೈಮೆನಿ ರಾಹ್ಯಾವ್ಹಯಿ ನವ್ವ ಕ್ಯಾ?

9 ದೇವಾಚೆ ಮೈಮೆಲಾ ನೀತಿಲಾ ವ್ಹಯಿ ಜಾಲ್ಯಾಲಿ ಸೇವೆ ಆನಿ ಇತ್ಲಿ ಮೈಮೆನಿ ರಾಧಿ ನವ್ವ ಕ್ಯಾ?

10 ಮುಟಿ ಮೈಮೆ ಆಲೆ ಮನ್ವುನ್ ಆಂದಿಚಿ ಮೈಮೆ ತ್ಯಚೆ ಮೊರ್ಹ್ ಜಾಲಿ ನಾಹಿ.

11 ಥೊಡಾಯೊಳ್ ರಾತ್ಯಾಲ್ಯಾಲಾ, ತ್ಯವ್ಣಾ ಉಜಿಡ್ ಆಸ್ಲಾತ್ ಶಾಸ್ವತ್ ರಾಧ್ಯಾಲ್ಯಾಲಾ ತ್ಯಚಿವ್ನಿ ಆಗಾವ್ ಉಜ್ಜಿಡ್ ರಾಹ್ಯಾವ್ಹಯಿ ನವ್ವ ಕ್ಯಾ?

12 ಆಮಾನಾ ಆಸ್ಲಾ ಇಸ್ವಾಸ್ ಹಾ ಮನ್ವುನುಸ್ ಆಮಿ ಯವ್ನಿ ಧೀರಾನಿ ಹಾವ್.

13 ತ್ಯಚಾ ತೊಂಡಾವ ಆಸ್‌ಲ್ಯಾ ಮೈಮಾ ಇಘುನ್ ಜಾತ್ಯಾಲ್ಯಾ ಇಸ್ರಾಯೇಲಾನಾ ದಿಸುನಾಹಿ ಮನ್ವುನ್ ಮೊಶೆ ಆಪ್‌ಲ್ಯಾ ತೊಂಡಾವ ಪಡ್ಡಾ ಗಾಲುನ್ ಗಿಹಿತಾ. ಆಮಿ ಮೊಶೆಚೆಗತ್ ಕರಿತ್ವಾಹಿ.

14 ಫನ್ ತ್ಯಂಚಿ ಮನ ಕರಿನ್ ಜಾಲ್ತೆತ. ಖರ್ತ್ಯಾನಿಸ್ ತ್ಯಾದಿಸಾ ಪರೆತ್ ಜುನಾ ಕರಾರ್ ವಾಚಿವ್ತಾನಾ ತ್ಯೊ ಪಡ್ಡಾ ಮನಾವ ಭಾಕುನ್ ರಾಹಿ. ತ್ಯೊ ಕ್ರಿಸ್ತಾಲಾ ಕಾಡಾಯಾ ವ್ಹನಾರ್.

15 ಹೆ ಯಳ ಪರೆತ್ ಮೊಶೆಚ್ ಧರ್ಮಶಾಸ್ತಾರ್ ವಾಚಿವ್ತಾನಾ ಪಡ್‌ದ್ಯಾನಿ ತ್ಯಂಚಿ ಮನ ಭಾಕುನ್ ರಾನ್ವಾರ್.

16 ತ್ಯಂಚಿ ಮನ ಪ್ರಭುಕ್ಡ ಪರಾಕ್ಲಿತಕಿ ತ್ಯೊ ಪಡ್ಡಾ ನಿಗ್ವಾರ್.

17 ತ್ಯೊ ಪ್ರಭು ದೇವಾಚೆ ಆತ್ಮನ್. ಪ್ರಭುಚೆ ಆತ್ಮ ಹ್ಯಂಚಿಪ ಸ್ವತಂತ್ರ ರಾತ್.

18 ಆಮಿ ಸಗ್ಳಿ ಪಡ್ಡಾ ಕ್ಯಾಡಲ್ಯಾಲ್ಯಾ ತೊಂಡಾನಿ ಪ್ರಭುಚಾ ಉಜ್ವೀಡ್ ಆರ್ಶಾತ್ ದಿಸ್ತ ತಸ ಬಗಿತ್ ಆಮಿ ಸಗ್ಳಿ ಪ್ರಭುನಿ ದಾನ್ ಕೆಲ್ಯಾಲ್ಯಾ ಆತಮ್ಯಾಚೆ ಮೈಮೆನಿ ಖುಬ್ ಮೈಮೆತ್ ಜಾಯಿತ್, ತೆ ಮೈಮೆಚೆಗತುಸ್ ವ್ಹತಾವ್. ಹ್ಯ ಆತ್ಮಜಾಲ್ಯಾಲ ಪ್ರಭುಚೆ ಕಾಮುಸ್ ಖರ.

4

ಆತ್ಮಿಕ್ ದವ್ತ

1 ಮನ್ವುನ್ ದೇವಾಚೆ ದಯನಿ ಹೀ ಸೇವೆ ಗೆತ್ಯಾಲ ಆಮಿ ಬಿಹುನ್ ಮಾಗ ಸರತ್ ನಾಹಿ.

2 ಲಾಜಚಿ ಚುರುನ್ ಕರ್ತ್ಯಾಲಿ ಕಾಮ ಸುಡುನ್ ಮೊಸ್ ಕರಾಚಾ ಸುಡುನ್ ದೇವಾಚಾ ವಾಕ್ಯಾತ್ ಮಿಳ್ವಾಚೆ ಆಂದಿ, ಖರ ನೀಯತಿನಿ ಸಿಕ್ವಿತ್ ಆಮಿ ನೀಯತಿಚ್ ಮನ್ವುನ್ ಪರ್ತೆಕ್ ಮಾನ್ವಾಚ್ ಮನ್ ದೇವಾಚೆ ಮೊರ್ದವ್ಪಯ್ ಮನ್ಯಾಚೆಗತ್ ಫಾಲ್ತಾವ್.

3 ಆಮಿ ಸಾಂಗ್ತ್ಯಾಲಿ ಬರಿ ಖಬರ್ ಥೊಡ್ಯಾನಾ ಚುರುನ್ ಆಸ್ಲಿತ ಹಾಳ್ ವ್ಹತ್ಯಾಲೆ ವಾಟವ್ಲ್ಯಾನಾ ತ್ಯ ಆಡ್ಶಾ ಹಾ.

4 ತ್ಯಂಚಾತ್ ದೇವಾಚೆಗತ್ ಆಸ್ಲ್ಯಾಲ್ಯಾ ಕ್ರಿಸ್ತಾಚಾ ಉಜೀಡ್ ದ್ಯಾವ್ನಾರ್ ಬರೆ ಖಬ್ರಿಚಾ ಉಜಿಡ್ ಬಗು ನಾಹಿ ಮನ್ವುನ್ ಹ್ಯಾ ಲೊಕಾತಲ್ಯಾ ದೇವಾನಿ ಇಸ್ವಾಸ್ ನಸಲ್ಯಾಲ್ಯಾಂಚಿ ಮನ ಆಂದ್ಲಿ ಕೆಲ್ಯಾತ.

5 ಆಮ್ಚಿ ಆಮಿ ವಳಕ್ ದಾವಾಚೆ ಆಂದಿ ಆಮಾನಾಸ್ ಯೇಸುಸ್ ಲಾಗುನ್ ತುಮಚ್ ಗುಲಾಮ್ ಮನ್ವುನ್ ಕ್ರಿಸ್ತ ಯೇಸುಲಾಸ್ ಪ್ರಭು ಮನ್ವುನ್ ಸಾಂಗ್ತಾವ್.

6 ಕಾ “ಮಂಜೆ ಆಂದಾರಾತ್ ಉಜೀಡ್ ಯವುನಿ” ಮನ್ವುನ್ ಸಾಂಗಲ್ಯಾಲ್ಯಾ ದೇವಾನಿ ಆಪ್ನುಸ್ ಯೇಸು ಕ್ರಿಸ್ತಾಚಾ ತೊಂಡಾವ ದಿಸ್ತಾರಿ ದೇವಾಚೆ ಮೈಮೆಚಾ ಗಿನ್ಯಾನ್ಯಾಚಾ ಉಜೀಡ್ ಖುಬ್ ಭನಾನಾ ಗಾವಾಯಾ ಸಾಟಿ ಆಮ್ಚಾ ಮನಾತ್ಲಿ ದಿಸ್ತಾ.

7 ಮಾತಿಚಾ ಗ್ಯಾಡ್‌ಗ್ಯಾಚೆಗತ್ ಆಮ್ಚಿಪ ಹೀ ಥರಿವ್‌ಲ್ಯಾಲಿ ದವ್ಲತ್ ಹಾ ಮನ್ವುನ್ ಆಸ್ಲಿ ಮೊಟಿ ತಾಕತ್ ದೇವಾಚಿ ಸುಡುನ್ ಆಮ್ಚಿಪ್ಪಿ ಆಲ್ಯಾಲಿ ನವ್ವ್.

8 ಚಾರಿಕ್ಷಿಬಿ ಆಮಾನಾ ಕಷ್ಟ ಆಸ್ಲಾ ತರಿ ಆಮಿ ತರಾಸ್ ಖಾನಾರಿನವ್ವ್ ಆಮಿ ಗೊಂದಾಳಾವ ತರಿ ನಿರಾಶ್ ವ್ಹನಾರ್ ನಾಹಿ.

9 ತರಾಸಾತ್ ಆಸ್ಲಾವ್ತರಿ ಹಾತ್ ಸುಟಲ್ಯಾಲಿನವ್ವ್ ಮಾರುನ್ ಪ್ಯಾಡ್ಲಾವ್ತರಿ ನಾಸ್ ವ್ಹನಾರಿ ನವ್ವ್.

10 ಯೇಸುಚಾ ಜೀವ್ ಆಮ್ಚಾ ಶರೀರಾತ್ ಹಾ ಮನ್ವುನ್ ದಾವುನ್ ದಿಯಾಸಾಟಿ ಯೇಸುಚ್ ಮರಾನ್ ಆಮಿ ಕವಾಬಿ ಶರೀರಾತ್ ಖಾನಾರಿ ಜಾಲ್ಯಾವ್.

11 ಯೇಸುಚಾ ಜೀವ್ ಆಮ್ಚಾ ಮೆಲ್ಯಾಲ್ಯಾ ಶರೀರಾತ್ ಹಾ ಮನ್ವುನ್ ದಿಸುನ್ ಯಯಾಸಾಟಿ ಜೀಥಿ ಆಸ್ಲಾರಿ ಆಮಿ ಯೇಸುಸ್ ಲಾಗುನ್ ಕವಾಬಿ ಮರ್ನಾಚಾ ಹಾತಾತ್ ದೆತ್ಯಾವ್.

12 ಆಸ ಆಮ್ಚಾತ್ ಮರಾನ್ ತುಮ್ಮಿಪ ಜೀವ್ ಕಾಮ ಕರ್ತೊ.

13 “ಮಿ ಇಸ್ವಾಸ್ ಥೆವ್ಲಾ ಮನ್ವುನ್ ಬೊಲ್ಲೊ. ” ಮನ್ವುನ್ ಶಾಸ್ತಾರಾತ್ ದಿಸತ್ಯಾ ಶಾರ್ಕ್ ಇಸ್ವಾಸಾಚ್ ತ್ಯಸ್ ಆತ್ಮ ಆಮ್ಚಿಪ ಹಾ ಮನ್ವುನ್ ಆಮಿ ಇಸ್ವಾಸಾನಿ ಬೊಲ್ತಾವ್.

14 ಪ್ರಭು ಜಾಲ್ಯಾಲ್ಯಾ ಯೇಸುಲಾ ಉಟಿವಲ್ಯಾಲಾ ಆಮಾನಾ ಸಾಹಿತ್ ಯೇಸು ಸಂಗ ಉಟ್ವುನ್ ತುಮ್ಮಿ ಸಂಗ ಆಪ್ಲೆ ಮೊರ್ಡ್ಲಿ ಉಬಾ ಕರ್ನಾರ್ ಮನ್ವುನ್ ಆಮಾನಾ ರಾವ ಹಾ.

15 ತ್ಯೊತರಾಸ್ ಸಗ್ಳಾ ತುಮ್ಮಾ ಬರ್ವ್ಯಾ ಸಾಟಿಸ್ ಆಮಾನಾ ಯನಾರ್. ತ್ಯಾತ್ ಮುಬ್ ಗಾವ್ವಾರಿ ದೇವಾಚಿ ಕ್ರಪಾ ಮುಬ್ ಲೊಕಾತ್ಲಿ ಕ್ರತಜ್ಜತಾಚಾ ಮನ್ವುನ್ ದೇವಾಚೆ ಮೈಮೆಲಾ ಮುಬ್ ಉಪ್ಕಾರಾಚಿ ಸ್ತುತಿ ವ್ಹನಾರ್.

ಇಸ್ವಾಸಾನಿ ಜಿವ್ವಾ ಕರಾಚಾ

16 ಮನ್ವುನ್ ಆಮಿ ಬಿಹಿತ್ನಾಹಿ. ಆಮಚ್ ಶರೀರ್ ನಾಸ್ ಜಾಲ್ತಾ ತರಿ ಆಮಚ್ ಆತ್ಮಿಕ್ ಮನ್ ದಿಸುನ್ದಿಸ್ ನವ ವ್ಹತ.

17 ಕಸ ಮಂಜೆ ತಾತ್ಕಾಲಿಕ ಆಸಲ್ಯಾಲಾ ಆಮಚ್ಚಾ ಹ್ಯೊ ಥೊಡಾ ತರಾಸ್ ಖುಬ್ ವ್ಹಪುನ್ ಪ್ರತಿ ಪಳ್ ಉತ್ಪನ್ ಕರುನ್ ಆಮಾನಾ ಮಾಪಾಯಾ ವ್ಹಯಿತ್ ನಾಹಿ ಯವ್ಹಿ ಮೈಮಾ ದೆತ.

18 ಆಮಿ ದಿಸತ್ಯಾಲ್ಯಾ ಗುಸ್ವಿಕ್ ಬಗಿತ್ಪಾಹಿ ಫನ್ ದಿಸ ನಸ್ಸಾರ್ಲ್ಯಾ ಗುಸ್ವಿಕ್ ಬಗ್ವಾರಿ ಭಾಲ್ಯಾವ್. ದಿಸ್ಸಾರ್ಲ್ಯಾ ಗುಸ್ವಿ ಖಾಯಿಮ್ ಹಾತಾ.

5

1 ಆಮಾನಾ ಸಮಾಜಲ್ಯಾ ಶಾರ್ಕ್ ದರ್ತಿವ ಆಮಚ್ಚ ಹ್ಯ ಶರೀರ್ ಮಂಥ್ಯಾಲ ಘರ್ ಪುಸುನ್ ಗೆಲತರಿ, ಸ್ವರ್ಗಾತ್ ದೇವಾನಿ ಘಡಿವಲ್ಯಾಲ ಯಾಕ್ ಘರ್ ಆಮಾನಾ ಹಾ; ತ್ಯ ಮಾನ್ವಾಚಾ ಹಾತಾನಿ ಬ್ಯಾಂದ್‌ಲ್ಯಾಲ ಘರ್ ನವ್ವ ತ್ಯಚೆ ಬದ್ಲಿಸ್ ಸ್ವರ್ಗಾತ್ ಯಾಕ್ ಶಾಸ್ವತ್ ಘರ್ ಆಮಾನಾ ಹಾ ಮನ್ವುನ್ ರಾವ ಹಾ.

2 ಆಮೀ ಹ್ಯಾ ಶರೀರಾತ್ ಆಸ ಪರತ್ ತಳ್ಳಳತ್; ಸ್ವರ್ಗಾತ್ ಗಾವ್ಸಾರ್ಲ್ಯಾ ಗರಾಟ್ ಪೊಶೆಕ್ ಗಾಲ್ವಾಯಾ ಆಮೀ ಮನ್ ಕರ್ತಾವ್.

3 ತ್ಯ ಗ್ಯಾತ್ಲಕಿ ಆಮೀ ನಾಗ್ನಿ ರಾಹಿತ್ಪಾಹಿ.

4 ಕಾ ಮಂಜೆ, ಗರಾಟ್ ಆಸಲ್ಯಾಲಿ ಆಮಿ ಆಮ್ಚಿವ ವಜ್ಜ ಪಡಲ್ಯಾಲ್ಯಾನಿ ತಳ್ಳಳ್ತಾವ ಫನ್ ಆಮಚ್ಚ ಕಪ್ಪ ಕಾಡಾಚ್ ಮನ್ ನಾಹಿ ಆಮಚ್ಚ ಸ್ವರ್ಗಾತ್ಲ ಪೊಶೆಕ್ ಗ್ಯಾತಲ್ಯಾವ ಮರಾಲ್ಯಾ ಶಾಸ್ವತ್ ಜಿವ್ ಬದಲ್ವಾರ್.

5 ಹ್ಯ ಆಮ್ಚಿ ಸಾಟಿ ತಯಾರ್ ಕೆಲ್ಯಾಲ ದೇವಾನಿಸ್; ತ್ಯಚಿ ಸಾಟಿ ತ್ಯನಿ ಪವಿತ್ರಾತ್ಮಚಿ ಖಾತ್ರಿ ಆಮಾನಾ ದಿಲೆ.

6 ಆಸ ಆಸ್ತಾನಾ ಆಮೀ ಕವಾಬಿ ಇಸ್ವಾಸಾನಿ ರಾಹ್ಯಾವ್ಹಯಿ; ಹ್ಯಾ ಶರೀರ್ ಮಂಥ್ಯಾಲ್ಯಾ ಗರಾಟ್ ಜೀವ್ವಾಕರಿ ಪರತ್ ಪ್ರಭುಪ್ಪಿ ದುರ್ ಹಾವ್

7 ಆಮಿ ಡೊಳ್ಳಾನಿ ದಿಸತ್ಯಾಶಾರ್ಕ್ ಚಾಲಾಚೆ ಆಂದಿ, ಇಸ್ವಾಸಾನಿ ಚಾಲ್ತಾವ್.

8 ಹ್ಯಸ್ ಯವಜ್ಞುನ್ ಆಮೀ ದಿರಾನ್ ರಾಥಾವ್ ಆನಿ ಶರೀರ್ ಮಂಥ್ಯಾಲ ಘರ್ ಸುಡುನ್ ಪ್ರಭುಪ ರಾಹ್ಯಾ ಆಮಿ ತಯಾರ್ ಹಾವ್.

9 ಮನ್ವುನ್ ಆಮೀ ಜರತ್ ಹಾವ್, ಮಂಜೆ ಆಮಿ ಹಿತ ಕಿವಾ ತಿಥ್ ಆಸ್ತಾವ್ ತರಿ, ಪ್ರಭುಲಾ ಆನಂದ್ ದೆನಾರ್ ಆಸ ರಾವ್ತಾವ್.

10 ಕಾ ಮಂಜೆ ಪರ್ತೆಕಾನಿ ಆಪ್ಲ್ಯಾ ಶರೀರಾನಿ ಕೆಲ್ಯಾಲ್ಯಾ ಚಾಂಗ್ಲೆ ನಾಹಿತ ಬುರ್ಶಾ ಕಾಮಾ ಶಾರ್ಕ್ ಪ್ರತಿಫಳ್ ಗಿಹ್ಯಾ ಸಾಟಿ ಪ್ರಭುಚಾ ನ್ಯಾಯಾಸನಾಚೆ ಮೊರ್ದ್ಹಾ ತಸ ದಿಸಾಯಾ ವ್ಹಯಿ.

ಕ್ರಿಸ್ತಾಸ್ಲಾಗುನ್ ದೇವಾ ಸಂಗ ರಾಜಿ ವ್ಹಯಾಚೆ

11 ಮನ್ವುನ್, ಪ್ರಭುಲಾ ಬಿಹ್ವುನ್ ರಾಹ್ಯಾವ್ಹಯಿ ಮನ್ವುನ್ ಆಮೀ, ಮಾನ್ಸಾನಾ ವಳಿವತಾವ್. ಆಮೀ ಕಸ್ಲಿ ಮನ್ವುನ್ ದೇವಾಲಾ ಸಮಾಜ್ಲಲ್ಯಾವ್. ತ್ಯ ತುಮಚಾ ಮನಾಲಾ ಸಾಹಿತ್ ರಾವ ಹಾ ಮನ್ವುನ್ ಇಸ್ವಾಸ್ ಕೆಲ್ಯಾ.

12 ಆಮೀ ಆಮಾನಾ ಪರ ಪರತ್ ತುಮ್ಚೆ ಮೊರ್ಹ್ ವವ್ಯಾಳುನ್ ಗಿಹಿತ್ನಾಹಿ; ಆತ್ಲಮನ್ ಬಗಾಚೆ ಆಂದಿ ತ್ಯಂಚಾ ಬಾಹಿರ್ಲಾ ಸಬಾವ್ ಬಗುನ್ ಮಿರಾವತ್ಯಾಲ್ಯಾನಾ ಶಾರ್ಕ್ ಮಾಗಾರ ಪರ್ತುನ್ ಸಾಂಗಾಯಾ ತುಮಾನಾ ವ್ಹನಾರ್.

13 ಕಾ ಮಂಜೆ ಆಮಿ ಖುಳ ಆಸ್ಲಾವ್ತ ತೀ ದೇವಾಚೆ ಮೈಮಾ ಸಾಟಿಸ್; ಸಮಾಜ್ಲಲ್ಯಾ ಮನಾಚೆ ಆಸ್ಲಾವ್ತ ತುಮ್ಚಾ ಪ್ಯಾಯ್‌ದ್ಯಾಸಾಟಿಸ್.

14 ಕಾ ಮಂಜೆ ಕ್ರಿಸ್ತಾಚಿ ಮಾಯಾ ಆಮಾನಾ ಬಳ್ ಜುರಿ ಕರ್ತಿ; ಸಗ್ಳ್ಯಾಂಚೆಸಾಟಿ ಯೊಕ್ ಮೆಲ್ಯಾ ನಂತರ್ ಸಗ್ಳಿ ಮಿಲಿತ ಮನ್ವುನ್ ಖಾತ್ರಿ ಕರ್ತಾವ್.

15 ಕ್ರಿಸ್ತ ಸಗ್ಳ್ಯಾಂಚೆ ಸಾಟಿ ಮೆಲ್ಯಾ ಮನ್ವುನ್ ಜೀವ್ನಾ ಕರ್ನಾರಿ ಹಿತ್ಲಿ ಮೊರ್ಹ್ ಆಪ್ಲಿ ಸಾಟಿ ಜೀವ್ನಾ ಕರಾಚಾ ಸುಡುನ್ ಆಪ್ಲಿ ಸಾಟಿ ಮರುನ್ ಉರುನ್ ಆಲ್ಯಾಲ್ಯಾ ಸಾಟಿ ಜೀವ್ನಾ ಕರಾಯಾವ್ಹಯಿ. ತ್ಯೊ ಸಗ್ಳ್ಯಾಂಚೆ ಸಾಟಿ ಮೆಲಾ.

16 ಆಸ ಆಸ್ತಾನಾ ಆಚಾನ್ ಆಮೀ ಕುನಾಲಾಸ್ ರಕ್ತಾ ಮಾಸಾನಿ ವಳಕ್ ಕರಿತ್ನಾಹಿ. ಯಂಗ್ಡಾ ಕ್ರಿಸ್ತಾಲಾ ಸಾಯಿತ್ ಆಮೀ ಆಸಾಸ್ ಸಮಜುನ್ ಗೆತ್ಲಾ ಫನ್ ಹಿತ್ಲಿ ಮೊರ್ಹ್ ತಸಾ ಸಮಜುನ್ ಗಿಹಿತ್ನಾಹಿ.

17 ಮನ್ವುನ್ ಕೊನ್ತರಿ ಕ್ರಿಸ್ತಾಪ ಆಸ್‌ಲ್ಯಾವ ತ್ಯೊ ನವಿ ಜಲಾಮಲ್ಯಾಲಾ. ಬಗಾ, ಪೈಲ ಸಗ್ಳೆ ಜಾವುನ್ ಸಗ್ಳೆ ನವ ಜಾಲ.

18 ಹೃ ಸಗ್ಗ ದೇವಾಪ್ಪಿಸ್ ಜಾಲ್ಯಾಲ. ದೇವಾನಿ ಕ್ರಿಸ್ತಾಸ್ ಲಾಗುನ್ ಆಮಾನಾ ಆಪ್ಲಿ ಸಂಗ ಎಕ್ ಕರುನ್ ಎಕಿಕರಾಚಿ ಸೇವೆ ಆಮಾನಾದಿಲೆ;

19 ಕಸ ಮಂಜೆ, ಕ್ರಿಸ್ತಾಪ ದೇವ್ ದುನ್ಯಾ ಆಪ್ಲಿ ಸಂಗ ಯೆಕ್ ಕರ್ತೊ; ಮಾನ್ಸಾಚಾ ಚುಕಿ ತ್ಯಂಚಾ ಲೆಕ್ಕಾತ್ ಗಾಲಾಚೆ ಆಂದಿ, ಹ್ಯೊ ಯಕಿಚಾ ಸಂದೇಸ್ ಸಗ್ಳ್ಯಾನಾ ಸಾಂಗಾಯಾ ತ್ಯೊ ಆಮಿವ ದಿಲ್ಯಾ.

20 ಮನ್ವುನ್ ಆಮೀ ಕ್ರಿಸ್ತ ಯೇಸುಚೆ ತರಪಿನಿ ವಕಿಲ್ ಹಾವ್. ದೇವುಸ್ ಆಮ್ಚಾಸ್ ತೊಂಡಾನಿ ಹಾಕಟ್ಯೊ ದೇವಾ ಸಂಗ ತುಮೀ ಯಕ್ ವ್ಹವಾ ಮನ್ವುನ್ ಕ್ರಿಸ್ತ ಯೇಸುಚಾ ನಾವಾನಿ ಆಮೀ ತುಮಾನಾ ಇನಂತಿ ಕರ್ತಾವ್.

21 ಪಾಪುಸ್ ರಾವ ನಸ್‌ಲ್ಯಾಲ್ಯಾ ಕ್ರಿಸ್ತ ಯೇಸುಲಾ ದೇವಾನಿ ಆಮಿ ಸಾಟಿ ಪಾಪಿ ಕರ್ತೊ. ಕ್ರಿಸ್ತ ಯೇಸುಪ ಆಮೀ ನೀಯೆತಿಚ್ ವ್ಹಯಾವ್ಹಯಿ ಮನ್ವುನ್ ದೇವಾನಿ ಆಸ ಕೆಲ್ಯಾ.

6

1 ದೇವಾಸಂಗ ರಾಬ್ಕಾರಿ ಆಮಿ ತುಮ್ಮಿಪ ಮಾಗಾಚ್ ಕ್ಯಾ ಮಂಜೆ; ದೇವಾಪ್ಲಿ ಗೆತಲ್ಯಾಲಿ ಕ್ರಪಾ ವ್ಯರ್ತ ಮನ್ವುನಕೊಸಾ.

2 ಅನಕುಲಾಚಾ ಕಾಲಾತ್ ತುಜ್ ಮಾಗ್ನ್ ಐಕ್ಲ.

ರಕ್ಷನಾಚಾ ದಿಸಾತ್ ತುಲಾ ಮಜತ್ ಕಿಲಿ ಮನ್ವುನ್ ದೇವ್ ಸಾಂಗ್ತೊ ನವ್ವ ಬಗಾ,

ಆತಾಸ್ ತ್ಯೊ ಚಾಂಗ್ಲಾ ಅನಕುಲಾಚಾ ಯೊಳ್; ಆಜುಸ್ ತ್ಯೊ ರಕ್ಷನಾಚಾ ದಿಸ್.

3 ಹೆ ಸೆವೆಲಾ ದೊಶ್ ಲಾವಾಲಾ ಜಾವುನಾಹಿ ಮನ್ವುನ್ ಆಮಿ, ಕಶಾತ್ ಕುನಿ, ಆಡ್ಕು ನಾಹಿ.

4 ಬದ್ಲಿಸ್, ಸಗ್ಳ್ಯಾನಾ ಗುಸ್ಪಿತ್ಲಿ ದೇವಾಚ್ ಸೇವಕ್ ಮನ್ವುನ್ ಆಮಿ ಆಮ್ಚೆ ಗುಸ್ಪಿಂಚಿ ಖಾತ್ರಿ ಕರುನ್ ದೆತಾವ, ಆಮೀ ಕಷ್ಟಾತ್ಲಿ ಗರಿಬ್ ಫನಾತ್ಲಿ ಆಡಚೆನಿತ್ಲಿ ಸುಸ್ಪುನ್ ಗೆತಾವ್.

5 ಮಾರಾತ್ನಿಬಿ, ಗಾನ್ವಾ ಕಳ್, ತುರುಂಗಾತ್ ಶಿಕ್ಷಾ ಕಾಲಿ. ಆಂಗ್ ಮುಡುನ್ ಕಾಮ್ ಕೇಲ. ಜಾಗ್ರಾನಿನಿ ದಮ್ಲಾವ್; ಬುಕನಿ ವಾಳಾವ್; ಹ್ಯಾ ಸಗಲ್ಯಾ ಗುಸ್ಪಿತ್ನಿ ಮುಬ್ ಸಮಾಧಾನ್ ದ್ಯಾವ್‌ಲ್ಯಾ.

6 ಚಾಂಗ್ಲಮನ್, ಗಿನ್ಯಾನ್, ಮುಬ್ ಥಂಡಫನ್, ದಯಾ, ಪವಿತ್ರಾತ್ಮಾಪ, ಕಪಟ್ ನಸ್‌ಲ್ಯಾಲಿ ಮಾಯಾ,

7 ಖರಿ ವಾಕ್ಯಾ ದೇವಾಚಾ ಬಳಾನಿ ಬರುನ್, ಹಿ ದುನಿ ಮಾಘ ತಾರನ್ ಕರಾಯಾ ಆನಿ ಲಡಾಯಿ ಕರಾಯಾ ನೀಯತಿಚಿ ಹತ್ಯಾರಿ ವಾಫರ್ತ್ಯಾತ.

8 ಆಮೀ ಮರಲ್ಯಾದ್ ಆನಿ ನಿಂದಾನಿ, ಅಪಕಿರ್ದಿನಿ ಆನಿ ಸತ್ಕಿರ್ದಿನಿ ಸೇವೆ ಕೆಲೆ. ಖರ ಆಸ್ಲಾವ್ ತರಿ ಫಸ್ತ ಮನ್ವುನ್ ಜಾಲ್ಯಾವ್.

9 ಆಮ್ಚಿ ವಳಕ್ ಆಸ್ಲಿತರಿ ವಳಕ್ ನಸ್‌ಲ್ಯಾಚೆಗತ್ ಸೇವೆ ಕೆಲೆ. ಮರ್ತ್ಯಾಲ ಜಾಲಾವ್ತರಿ, ಜಗಲ್ಯಾವ್! ಬಗಾ, ಶಿಕ್ಷೆತ್ ಗಾವ್ಲಾವ್ ತರಿ ಮರ್ನಾರ್ ನವ್ವ.

10 ದುಖಿ ಜಾಲಾವ್ ತರಿ ಸೇವೆತ್ ಕವಾಬಿ ಸಂತೊಷ್ ವ್ಹತಾವ್, ಗರಿಬ್ ಆಸ್ಲಾವ್ ತರಿ ಮುಬ್ ಜನಾನಾ ಸಾವ್ಕಾರ ಕೀಲಿತ; ಕಾಯೆಕ್ ನಸ್‌ಲ್ಯಾಲ ಆಸ್ಲಾವ್ ತರಿ ಆಸ್‌ಲ್ಯಾಲ ಜಾಲ್ಯಾವ್.

11 ಕೊರಿಂಥಾನು, ಉಗಡ್ ಮನಾನಿ ಆಮಿ ತುಮ್ಮಿ ಸಂಗ ಬೊಲ್ಯಾವ್.

12 ತುಮ್ಮಿವ ಆಮಾನಾ ಆಸ್‌ಲ್ಯಾಲಿ ಮಾಯಾ ಥಾಂಬ್ಲಿ ನಾಹಿ ಫನ್ ಆಮ್ಚಿವ ತುಮಾನಾ ಆಸ್‌ಲ್ಯಾಲಿ ಮಾಯಾ ಥಾಂಬ್ಲಿ.

13 ಮನ್ವುನ್ ಪೊರಾನಾ ಸಾಂಗ್‌ತ್ಯಾಚೆಗತ್ ಸಾಂಗ್ತಾವ್; ಆಮಿ ತುಮಾನಾ ಕಸಿ ಮನ ಉಗಡಲ್ಯಾತ , ತಸಿಸ್ ತುಮಿ ಆಮಾನಾ ಮನ ಉಗ್ಡಾಯಾ ವ್ಹಯಿಸಾ.

ಇಸ್ವಾಸಾತ್ ನಸ್‌ಲ್ಯಾಲ್ಯಾಂಚೆ ಪ್ರಭಾವಾಚೆ ಗುಶ್ಟಿತ್ ಹುಶಾರ್ಕಿ

14 ತುಮಿ ಕ್ರಿಸ್ತಾವ ಇಸ್ವಾಸ್ ನಸ್‌ಲ್ಯಾಲ್ಯಾಸ್ನಿ ಲಾಗುನ್ ಇಚ್ಛೊಡ್ ವ್ಹವುನಕೊಸಾ. ಬರಲ್ಯಾಲಾ, ಬುರಶಾಲಾ ಸಮನ್ ಕ್ಯಾ?

15 ಉಜೀಡಾಲಾ ಆಂದಾರಾಲಾ ಮಾಯಾ ಕ್ಯಾ? ಕ್ರಿಸ್ತಾಲಾ ಸೈತಾನಾಲಾ ಯಕಿ ವ್ಹಯಿಲ್ ಕ್ಯಾ? ಇಸ್ವಾಸಿನಾ ಅಇಸ್ವಾಸಿನಾ ಸಮನ್ ಕ್ಯಾ?

16 ದೇವಾಚಾ ಗರಾಲಾ, ಪಾಶಾನಾನಾ ಒಪ್ಪಿ ಕ್ಯಾ? ಆಮಿ ದೇವಾನಿ ಸಾಂಗ್ಲಲ್ಯಾ ಶಾರ್ಕ್ ಜೀವ್ ಆಸ್ತಾರ್ಲ್ಯಾ ದೇವಾಚೆ ಗರ್ ಜಾಲ್ಯಾವ್ ನವ್ವ ಮಾಜಾ ಲೊಕಾನು ಮೀ ಗರ್ ಕರ್ತೊ, ತ್ಯಂಚೆ ಮದ್ದಿ ಮೀ ಫಿರ್ನಾರ್ ತ್ಯನಾ ಮೀಸ್ ದೇವ್ ಜಾಲ್ಯೊ.

ತೀ ಮನಾ ಪ್ರಜಾ ವ್ಹನಾರ್ ಮನ್ವನ್ ಸಾಂಗ್ಲಲ್ಯಾ

17 ಮನ್ವನ್, ದುಸ್ಮಾರ್ಲ್ಯಾ ಲೊಕಾನಾ ಸುಡುನ್ ಬಾಹಿರ್ ಯವಾ ತ್ಯಂಚಿಪ್ಪಿ ಯಗ್ತುನ್ ಜೀವ್ತಾಕರಾ ಬುರ್ಶಾಲಾ ಹಾತ್ ಲಾವುನಕೊಸಾ ಮನ್ವನ್ ಪ್ರಭು ಸಾಂಗ್ತೊ ತವಾ ಮಿ ತುಮಚಾ ಸ್ವಿಕಾರ್ ಕರಿಲ್.

18 ಯವ್ವಸ್ವವ್ವ ಮಿ ತುಮಾನಾ ಬಾ ವ್ಹನಾರ್; ತುಮಿ ಮಾಜಿ ಪೊರ ವ್ಹನಾರ್ ಮನ್ವನ್ ಸಗ್ಳ್ಯಾಪಿ ಮೊಟಾ ಪ್ರಭು ಸಾಂಗ್ತೊ.

7

1 ಮಾಯೆಚಾ ಬನ್ವಿ ಬಾವ್ತಾನು, ಹೀ ವಾಗ್ವಾನ ಆಮಾನಾ ಹಾತ ಮನ್ವನ್, ಆಮಿ ಶರಿರ ಆತ್ಮ್ಯಾತ್ ಆಸಲ್ಯಾಲ ಬುರ್ಸ ಕಾಡುನ್ ಆಮಾನಾ ಬರಕರುನ್ ದೇವಾಚಾ ಭ್ಯಾನಿ ಬರುನ್ ಪವಿತ್ರಲಾ ಪುರಿ ಯತ್ನ ಕರುಯಾ.

ಪೌಲಾಚಾ ಸಂತೊಶ್

2 ತುಮಚಾ ಮನಾತ್ ಆಮಾನಾ ಜಾಗಾದೆವಾ; ತುಮ್ಚಾತ್ ಕುನಾಲಾಸ್ ಆಮಿ ಅನೆವ್ ಕೆಲಾನಾಹಿ, ಕುನಾಪ್ಪಿ ಪ್ಯಾಯ್ದಾ ಗೆತ್ಲಾ ನಾಹಿ, ಕುನಾಲಾ ಫಸಿವ್ಲ ನಾಹಿ.

3 ತುಮ್ಚಿವ ಚುಕ್ ವಾವಾಯಾವ್ವಯಿ ಮನ್ವನ್ ಆಮಿ ಹ್ಯ ಖಡ್ಯಾವಿತ್ಲಾಹಿ; ತುಮ್ಚಿ ಸಂಗ ಮೆಲಾವ್ತರಿ, ಜಗ್ಲಾವ್ತರಿ ತುಮಿ ಆಮ್ಚಾ ಮನಾತ್ ಹಾಸಾ ಮನ್ವನ್ ಮೀ ಆಂದಿಸ್ ತುಮಾನಾ ಸಾಂಗ್ಲಲ್ಯಾ ನವ್ವ.

4 ತುಮ್ಚಿವ ಮನಾ ಖುಬ್ ಇಸ್ವಾಸ್ ಹಾ, ಖುಬ್ ಅಭಿಮಾನ್ ಹಾ. ಮೀ ಸಗ್ಳ್ಯಾ ತರಾಸಾತ್ ಬಿಹ್ಯಾಚೆ ಆಂದಿ ಸಂತೊಶಾನಿ ಬರುನ್ ವ್ಹಾಪ್ತಾವ್.

5 ಆಮಿ ಮಕೆದೊನ್ಯಾತ್ ಆಲ್ಯಾ ನಂತರ್ ಆಮ್ಮಾ ಶರೀರಾಲಾ ಇಸ್ರಾಮಾ ನವ್ವಾ ಬದ್ಲಿಸ್ ಸಗ್ಳ್ಯಾ ಗುಸ್ತಿತ್ಲಿ ಆಮಾನಾ ತರಾಸ್ ಹುತ್ತ್. ಬಾಹಿರ್ ಕಳ್, ಮನಾತ್ ಭ್ಯಾ

6 ಫನ್ ಗರಿಬ್ತಿತ್ ಆಸ್‌ಲ್ಯಾಲ್ಯಾನಾ ಸಮ್ಜಾವ್ನ್ಯಾ ದೇವಾನಿ ತೀತಾಲಾ ಲಾವುನ್ ದಿವುನ್ ಆಮಾನಾ ಸಮ್ಜಾವ್ನ್.

7 ತ್ಯಚಾ ಯನ್ಯಾನಿ ತ್ಯವ್ಡಸ್ ನವ್ವ ತುಮ್ಮಿಪ್ಪಿ ಖುಬ್ ಥಂಡ್ವನ್ ಗೆತ್ಲ ಮನ್ವುನ್, ತುಮ್ಮಿ ಖುಬ್ ಮಾಯಾ, ತುಮಚ್, ದುಖ್, ಮಾಜಿವ್ ಆಸ್‌ಲ್ಯಾಲಿ ತುಮ್ಮಿ ಕ್ಯಾಳಜಿ; ಹ್ಯ ಆಮಾನಾ ಸಾಂಗ್ಲ ತವಾ ಆಮಿ ಆನಿಕ್ ಖುಬ್ ಸಂತೊಶ್ ಜಾಲಾವ್.

8 ಮೀ ಲಿವ್‌ಲ್ಯಾಲ್ಯಾ ಪತರ್‌ನಿ ತುಮಾನಾ ದುಖ್ ಜಾಲತರಿ ಮನಾ ಬೆಜಾರ್ನಾಹಿ, ತ್ಯ ತುಮಾನಾ ಥುಡಿ ಯಳ್ ದುಖಿವ್ವಾರ್ ಮನ್ವುನ್ ಮೀ ಆಂದಿ ಪಶ್ಚತ್ತಾಪ್ ಪಡ್ಲೊತರಿ ಆತಾ ಸಂತೊಶ್ ವ್ಹತೊ.

9 ತುಮಾನಾ ತರಾಸ್ ಜಾಲಾ ಮನ್ವುನ್ ಮೀ ಆತಾ ಸಂತೊಶ್ ವ್ಹಯಾಚೆ ಆಂದಿ ತುಮಿ ದುಖಾನಿ ಪಶ್ಚತ್ತಾಪ್ ಪಡುನ್ ಮನ್ ಬದಲಾಚ್ ಮನ್ವುನ್ ಸಂತೊಶ್ ವ್ಹತೊ. ತುಮಾನಾ ದೇವಾಚಾ ಮನಾ ಶಾರ್ಕ್ ದುಖ್ ಜಾಲ ಮನ್ವುನ್ ಆಮ್ಮಿಪ್ಪಿ ಕಶಾತುಸ್ ತುಮಾನಾ ಲುಕ್ಷಾನ್ ಜಾಲಿನಾಹಿ ನವ್ವ

10 ದೇವಾಚಾ ಮನಾ ಶಾರ್ಕ್ ದುಖ್ ರಕ್ಷನೆಲಾ ಕಾರನ್ ಜಾಲ್ಯಾಲ ಮನ್ ಪರತ, ತ್ಯ ಮನ್ ಪರಾತಲ್ಯಾಲ್ಯಾತ್ ಪಶ್ಚತ್ತಾಪಾಲಾ ಆವಕಾಸ್ ನಾಹಿ; ಫನ್ ಜಗತಿತ್ಲ ದುಖ್ ಮರಾನ್ ಆಂತ.

11 ಬಗಾ ತುಮಿ ದೇವಾಚಾ ಮನಾ ಶಾರ್ಕ್ ತುಮಿ ದುಖ್ ಖಾಲಸಾ, ಝುಕ್ ಕೆಲ್ಯಾಲ್ಯಾನಾ ಶಿಕ್ಷಾದಿಯಾ ಕ್ಯವ್ಲಿ ಕಳ್ಳಳ್. ತುಮಿ ನಿರ್ದೋಷಿ ಮನ್ವುನ್ ದಾವುನ್ ದಿಯಾ ಕ್ಯವ್ಲಿ ಖಿಟ್ಟಿಟ್ ಕಿಲಿಸಾ, ಕ್ಯವ್ಲಾ ಮನಾಲಾ ತರಾಸ್ ಕರುನ್ ಗೆತ್ಲಾಸಾ; ಕಸ್ಲ ಭ್ಯಾ ದ್ಯಾವ್ಲಸಾ; ಮರೆದಿ ಸಾಟಿ ಕ್ಯವಡ್ಯಾ ರಾಗಾನಿ ಶಿಕ್ಷಾದಿಲಿಸಾ ಹ್ಯ ಸಗ್ಳ ಪಟ್ಟುನ್ ಆಲ್ಯಾ

12 ಮೀ ತುಮಾನಾ ಲಿವ್‌ಲ್ಯಾಲ ಝುಕ್ ಕೆಲ್ಯಾಲ್ಯಾಲಾ ಶಿಕ್ಷಾವ್ವುನಿ ಮನ್ವುನ್ ನವ್ವ ತ್ಯೆ ಝುಕಿನಿ ದುಖ್ ಜಾಲ್ಯಾಲ್ಯಾಲಾ ನ್ಯಾಯ ಗಾವುನಿ

ಮನ್ವುನ್ ನವ್ವ; ಆಮ್ಚೆ ಗುಸ್ತಿತ್ ತುಮಾನಾ ಆಸ್‌ಲ್ಯಾಲಿ ಕ್ಯಾಳಜಿ, ದೇವಾಚೆ ಮೊರ್ಹ ತುಮಾನಾ ದಿಸುನಿ ಮನ್ವುನ್ ಲಿವ್‌ಲ್ಯಾ.

13 ಮನ್ವುನುಸ್ ಆಮ್ಚಾ ಮನಾಲಾ ಸಮಾದಾನ್ ಗಾವಲ್ಯಾ ತ್ಯವ್ಡಸ್ ನವ್ವ ತುಮಿ ಸಗ್‌ಳ್ಯಾಂಚಾನಿ ತೀತಾಲಾ ಸಂತೊಶ್ ಕೆಲ್ಯಾಸಾ ಮನ್ವುನ್ ತ್ಯಾಚಾ ಸಂತೊಶ್ ಬಗುನ್ ಆಮಿ ಆನಿ ಇತ್ಲಿ ಸಂತೊಶ್ ಜಾಲಾವ್.

14 ಕಾ ಮಂಜೆ ಮೀ ತೀತಾಚೆ ಮೊರ್ಹ ತುಮಾನಾ ವವ್ಯಾಳ್ಯಾಲ ಖರ; ತಸ ವವ್ಯಾಳ ಮನ್ವುನ್ ಮೀ ಲಾಜಾಯಾನಕೊ. ಬದ್ಲಿಸ್ ಆಮಿ ತುಮಾನಾ ಸಾಂಗ್‌ಲ್ಯಾಲ್ಯಾ ಸಗ್‌ಳ್ಯಾ ಬೊಲ್ಯಾ ಕಶಾ ಖರ್ಲ್ಯಾ ಜಾಲ್ಯಾತಾ ತಸ್ಯಾನ್ ಆಮಿ ತೀತಾಚೆ ಮೊರ್ಹ ಬೊಲ್ಯಾಲ್ಯಾ ವವ್ಯಾಳ್ವೆಚಾ ಬೊಲ್ಯಾ ಸಗ್‌ಳ್ಯಾ ಖರ್ಲ್ಯಾ ಮನ್ವುನ್ ದಿಸುನ್ ಆಲ್ಯಾ.

15 ತುಮಿ ವಿದೆಯತ್ ಬಖ್ತಿನಿ ತ್ಯಲಾ ಗೆತಲ್ಯಾಲಾ ಯಾದ್ ಕರ್ತಾನಾ ತುಮ್ಚಿವ ತ್ಯಲಾ ಆಸ್‌ಲ್ಯಾಲಿ ಮಾಯಾ ಲ ಜಾಲ್ಲೆ.

16 ತುಮ್ಚಿವ ಮನಾ ಸಗ್‌ಳ್ಯಾತ್ ಪುರಾ ಇಸ್ವಾಸ್ ಹಾ ಮನ್ವುನ್ ಮೀ ಸಂತೊಶ್ ವ್ಹತೊ.

8

ಉಗ್‌ಡ್ಯಾ ಮನಾನಿ ದಿವಾ

1 ಮಾಯಾಚಾ ಬನ್ವಿ ಬಾವ್ತಾನು, ಮಕೆದೊನ್ಯಾತ್ಲೆ ಸಭೆನಾ ದಿಲ್ಯಾಲಿ ದೇವಾಚೆ ಕ್ರುಪೆಚೆ ಗುಸ್ತಿತ್ ತುಮಾನಾ ಸಾಂಗಾಯಾ ವ್ಹಯಿ ಮನ್ವುನ್ ಮನ್ ಕರ್ತಾವ್,

2 ತೆ ಸಭೆತಲ್ಯಾನಾ ಖುಬ್ ಕಷ್ಟ ಆಲಾತರಿ ಖುಬ್ ಗರಿಬ್ತಿತಿತ್ ಆಸ್ಲತರಿ ಖುಬ್ ಸಂತೊಶಾನಿ ಬರುನ್ ಖುಬ್ ಉಧಾರ್ ಜಾಲಿತ.

3 ತ್ಯನಾ ಕಿತ್ಲೆ ದಿಯಾವ್ತ ತ್ಯವ್ಡಸ್ ನವ್ವ ತ್ಯಚಿವ್ನಿ ಆಗಾವ್ ಉಮೆದಿನಿ ದಾನ್ ಕೆಲ ಹ್ಯಲಾ ಮಿಸ್ ವಳಕ್.

4 ಯುದಾಯಾತ್‌ಲ್ಯಾ ದೇವಾಚಾ ಲೊಕಾನಾ ಮಜ್ಜತ್ ಕರ್ತ್ಯಾಲ್ಯಾ ಕಾಮಾತ್ ಆಪ್ಲು ವಾಟ್ಲೆಗಿಹ್ಯಾ ಹುಕುಮ್ ಗಿಹ್ಯಾ ಆಮ್ಚಿಪ ಖುಬ್ ಮಾಗ್ಲೆ.

5 ಆಮಿ ಹ್ಯಚಿ ಆಶಾ ಥೆವಲ್ಯಾಚೆಗತ್ ತ್ಯಂಚಾನಿ ದಿಯಾಚೆಆಂದಿ, ಆಪ್ಲ್ಯಾನಾ ಆಪ್ಲು ಪ್ರಭುಚಾ ಹಾತಾತ್ ದೆತ್ಯಾತ್; ನಂತರ್ ದೇವಾಚಾ ಮನಾಚೆಗತ್ ಆಮಾನಾ ಆಪ್ಲ್ಯಾನಾನ್ ದೆತ್ಯಾತ್.

6 ತೀತಾನಿ ಸುರುಕೆಲ್ಯಾ ಶಾರ್ಕ್ ಧರ್ಮಾಚಿ ಕಾಮ ಕರಾಯಾವ್ಹಯಿ ಮನ್ಹುನ್ ಆಮಿ ತ್ಯಚಿಪ ಮಾಗ್ಲೆ.

7 ತುಮಿ ದೇವಾವಲ್ಯಾ ಇಸ್ವಾಸಾನಿ, ಬುಲಿತ್ ಶಾನ, ಗಿನ್ಯಾನ್ಯಾತ್, ಸಗ್ಳೆ ತರಚೆ ಉಮೇದಿತ್ ಆನಿ ಆಮ್ಚಾ ಹುಕ್ಮಾನಿ ತುಮ್ಮಿಪ ಉತ್ಪನ್ ಜಾಲ್ಯಾಲೆ ಮಾಯೆತ್ ಕಸ ವಾಲ್ಯಾಂಡ್ಲ್ಯಾಸಾ ತಸಸ್ ಹ್ಯಾ ಧರ್ಮಾಚಾ ಕಾಮಾತ್ಪಿ ವಾಡತ್ ಜಾವಾ.

8 ಹೆ ಅಜ್ಞಾನಿ ಸಾಂಗಿತ್ವಾಹಿ ಫನ್ ದುಸ್ಮಾಚೆ ಆಶಾಲಾ ಮಿಳ್ಹುನ್ ತುಮ್ಮಿ ಮಾಯಾ ಕೃಪ್ತಿ ಖರಿ ಮನ್ಹುನ್ ಸಾಬೀತ್ ಕರಾಯಾ ವ್ಹಯಿ ಮನ್ಹುನ್ ಸಾಂಗ್ತೊ.

9 ಆಮ್ಚಾ ಪ್ರಭು ಯೇಸು ಕ್ರಿಸ್ತಾಚಿ ಕ್ರಪಾ ತುಮಾನಾ ರಾವಿ ಹಾ ನವ್ವ; ತ್ಯೊಸಾವೊರ್ ಆಸ್ಲಾತರಿ ಗರಿಬ್ಹೀತಿತ್ಪಿ ತುಮಿ ಸಾವ್ಕಾರ್ ವ್ಹಯಾ ವ್ಹಯಿಸಾ ಮನ್ಹುನ್ ತುಮ್ಮಿಸಾಟಿ ತ್ಯೊ ಗರಿಬ್ ಜಾಲಾ.

10 ಹ್ಯಾ ಧರ್ಮಾಚಾ ಕಾಮಾಚೆ ಗುಸ್ತಿತ್ ಮಾಜಿ ಪಾರಕ್ ಸಾಂಗ್ತೊ, ಹ್ಯ ತುಮ್ಮೆ ಮಜ್ಜತಿಸಾಟಿ; ಹ್ಯ ಕಾಮ್ ಯಕಾ ವರ್ಸಾಚೆ ಮಾಗ ಕರಾಯಾ ತುಮಿ ಮನ್ ಕೆಲ್ಯಾಲ ಚಾಂಗ್ಲವಾಟ್ಲೆ ಮೊರ್ಹಜಾಯಾ ಮನ್ಕೆಲ್ಯಾ ಶಾರ್ಕ್ ತ್ಯ ಹಾತಾತ್ ಯಯಾ ಯತ್ನಕರಾ.

11 ಹ್ಯ ಕಾಮ್ ಸುರು ಕರಾಯಾ ತುಮ್ಮಿಪ ಶಾರ್ಕ್ ಮನ್ ಹಾ, ತಸಸ್ ತುಮಿ ಬೊಲ್ಯಾ ಶಾರ್ಕ್ ತುಮ್ಚೆ ಕಾಮ್ ಪುರಾ ಕರಾ.

12 ಯಕ್ಟಾನ್ ದಿಯಾಲಾ ಮನ್ ಕೆಲತ ತ್ಯನಿ ಉದಾರ್ ಮಾನಾನಿ ದಿಲತ ತ್ಯ ಮಾನ್ಯಾ ವ್ಹನಾರ್; ತ್ಯಲಾ ದೇವಾಪ್ಲಿ ಮರ್ಯಾದ್ ಗಾವ್ನಾರ್.

13 ದುಸ್ಮಾರ್ಚಾ ಕಸ್ವಜಾಯಾ, ಆನಿ ತುಮಾನಾ ಕಸ್ವಯಯಾ ಮಾಜ್ ಮನ್ ನವ್ವ; ದೊಗಬಿ ಸಮಾ ವ್ಹಯಾ ವ್ಹಯಿಸಾ ಮನ್ಯಾಚೆಸ್ ಮಾಜ್‌ಮನ್.

14 ಕವಾ ತುಮಿ ತರಾಸಾತ್ ಹಾಸಾ ತವಾ ತ್ಯಂಚಿಪ ಖುಬ್ ಆಸ್ಥಾನಾ ತೀ ತುಮಾನಾ ಮಜ್ಜತ್ ಕರ್ನಾರ್. ಆಸಸ್ ಯಕಾ ಮಕಾಲಾ ತುಮಿ ಮಜ್ಜತ್ ಕರ್ತ್ಯಾಲ ವ್ಹನಾರ್.

15 ಧರ್ಮಶಾಸ್ತ್ರಾರಾತ್ ಲಿವ್‌ಲ್ಯಾಚೆಗತ್ ಖುಬ್ ಮಿಳಿವ್‌ಲ್ಯಾಲ್ಯಾಲಾ ಖುಬ್ ಜಾಲನಾಹಿ ಥೊಡ ಮಿಳಿವ್‌ಲ್ಯಾಲ್ಯಾಲಾ ಕಾಯ್ ಕಮಿ ಜಾಲನಾಹಿ.

ತಿತಾ ಆನಿ ತ್ಯಚಿ ಸಂಗ ಕಾಮ್ ಕರ್ನಾರ

16 ತುಮ್ಚೆ ಗುಸ್ತಿತ್ ಆಮಾನಾ ಆಸ್‌ಲ್ಯಾಲಿ ಕ್ಯಾಳ್ಜಿ ದೇವಾನಿ ತೀತಾಚಾ ಮನಾಸ್ಚಿ ಪಿಕಿವ್‌ಲ್ಯಾಲೆಸಾಟಿ ತ್ಯಲಾ ಸ್ತೊತ್ರ ವ್ಹವ್ಣಿನಿ.

17 ತ್ಯೊ ತುಮ್ಚಿಪ ಜಾಯಾವ್ಣಯಿ ಮನ್ವನ್ ಆಮಿ ಮಾಗ್ಲ ತವಾ ತ್ಯೊ ಹು ಮನ್ವನ್ ಉಮೆದಿನಿ, ಆಪ್‌ಲ್ಯಾ ಮನಾನಿ ತುಮ್ಚಿಪ ಆಲಾ.

18 ತ್ಯಚಿ ಸಂಗ ಆನಿ ಯಕಾ ಬಾವ್ತಾಲಾಬಿ ಲಾವುನ್‌ದಿಲ್ಯಾ ಹ್ಯಾ ಬಾವ್ತಾಚ್ ಬಾವ್ತು ಬರಿ ಖಬ್ರಿಚೆ ಸೇವೆತ್ ಸಗ್ಳೆ ಸಭೆತ್ಚಿ ನಾವ್ ವಾಜ್‌ಲ್ಯಾ.

19 ಯವ್ಡಸ್‌ನವ್ವ ಪ್ರಭುಚೆ ಮೈಮೆಸಾಟಿ ಆನಿ ಆಮಚ್ ಶಾರ್ಕ್ ಮನ್ ದಾವಾಯಾಸಾಟಿ ಆಮಿ ಚಾಲಿವತ್ಯಾಲ ಧರ್ಮಾಚಾ ಕಾಮಾಶಾರ್ಕ್ ಆಮ್ಚಿ ಸಂಗ ಯಯಾ ಸಭೆತ್ಚಿ ಹ್ಯಲಾ ನಿವಡ್‌ಲ್ಯಾ.

20 ಆಮಿ ಗೊಳಾ ಕರ್ತ್ಯಾಲೆ ಹೆ ಉಮೆದಿನಿ ದಿಲ್ಯಾಲೆ ದಿನ್ಗಿಚೆ ಗುಸ್ತಿತ್ ಯಕಾಲಾಬಿ ಆಮ್ಚಿವ ಚುಕ್ ವಾವಾಯಾ ಆವ್ಕಾಸ್ ದಿವುನಾಹಿ.

21 ಕಾ ಮಂಜೆ ದೇವಾಚೆ ನದ್ರತ್ ತ್ಯವ್ಡಸ್ ನವ್ವ ಮಾನ್ಸಾಚೆ ನದ್ರತ್ಚಿ ಚಾಂಗ್ಲತ್ಯ ಕರಾಚ್ ಆಮಚ್ ಮನ್ವ್.

22 ಹ್ಯಂಚೆ ದೊಗಾಂಚೆ ಸಂಗ ಆಮ್ಚಾ ಬಾವ್ತಾತ್‌ಲ್ಯಾ ಆನಿ ಯಕಾಲಾ ಲಾವುನ್‌ದಿಲ್ಯಾ; ಆಮಿ ಖುಬ್ ಯಳಾ, ಖುಬ್ ಕಾಮಾತ್ಚಿ ತ್ಯಚಿ ಪಾರಕ್ ಕರುನ್ ಮನ್ ಆಸ್‌ಲ್ಯಾಲಾ ಮನ್ವನ್ ಸಮಜುನ್ ಗೆತಲ್ಯಾ; ಆತ್ತಾ ತ್ಯನಿ ತುಮ್ಚಿವ ಥೆವ್‌ಲ್ಯಾಲಾ ವ್ಹಯಿತ್ಯೊ ಇಸ್ವಾಸಾನಿ ಆಜುನ್ ಖುಬ್ ಮಜ್ಜತ್ ಕರಾಯಾ ಆಸ್ತಾರಾಜಾಲ್ಯಾ.

23 ತೀತಾಚೆ ಗುಸ್ತಿತ್ ಸಾಂಗಾಚೆ ಜಾಲ್ಯಾವ, ತ್ಯೊಮಾಜಾ ವಾಟದಾರ್ ತುಮ್ಮಾ ಫ್ಯಾಯದ್ಯಾಸಾಟಿ ಮನಾ ಮಜತ್ ಕರ್ನಾರಾ ಜಾಲ್ಯಾ; ತ್ಯಾ ಬಾವ್ವಾಚೆ ಸಾಂಗಾಚೆ ಜಾಲ್ಯಾವ, ತೆ ಸಭೆತ್ಲಿ ಲಾವುನ್ ದಿಲ್ಯಾಲ ಆನಿ ಕ್ರಿಸ್ತಾಚಿ ಮೈಮಾ ದಾವುನ್‌ದೆನಾರ ಜಾಲ್ಯಾತ.

24 ತ್ಯಂಚಿಸಾಟಿ ಹ್ಯನಾ ಮಾಯೆನಿ ಬಗಾ. ಆಮಿ ತುಮಾನಾ ವವ್ಯಾಳ್ಕಾ ಶಾರ್ಕ ಚಾಲುನ್ ಸಭೆನಾ ತುಮ್ಮಿ ಮರ್ಯಾದ್ ದಾವುನ್‌ದೆವಾ.

9

ಇಸ್ವಾಸಾತ್ ಆಸ್‌ಲ್ಯಾ ಕ್ರಿಸ್ತಾನಾ ಮಜತ್ ಕರಾಚಿ

1 ಯುದಾಯಾತ್‌ಲ್ಯಾ ದೇವಾಚಾ ಲೊಕಾಂಚಿ ತುಮಿ ಸೆವಾ ಕರಾಚೆ ಗುಸ್ತಿತ್ ಮೀ ತುಮಾನಾ ಲಿವಾಚಿ ಗರಜ್ ನಾಹಿ.

2 ತುಮ್ಮಾ ಮನಾತ್ ಕ್ಯಾ ಹಾ ಮನ್ವುನ್ ಮನಾ ಠಾವ ಹಾ. ಗೆಲ್ಯಾಲ್ಯಾ ವರ್ಸಾ ದರ್‌ನಿ ಅಖಾಯಾತ್ಲಿ ಮಜತ್ ಕರಾಯಾ ತಯಾರ್ ಹುತಿತ್ ಮನ್ವುನ್ ಮಕೆದೊನ್ಯಾತ್‌ಲ್ಯಾಂಚೆ ಮೊರ್ಹ ತುಮಾನಾ ವವ್ಯಾಳಿತೊ. ಆನಿ ತುಮ್ಮಿ ಹಾವುಸ್ ತ್ಯಂಚಾತ್‌ಲ್ಯಾ ಖುಬ್ ಲೊಕಾನಾ ಹಾಕ್ತಿತಿ.

3 ಫನ್ ಮೀ ತುಮಾನಾ ವವ್ಯಾಳ್ಕಾಲಿ ಆಧಾರ್‌ನಸ್ತಾನಾ ಮೀ ಸಾಂಗ್‌ಲ್ಯಾ ಶಾರ್ಕ ತುಮಿ ತಯಾರ್ ಆಸಿಲಾ ಮನ್ವುನ್ ತ್ಯಾ ಬನ್ನಿ ಬಾವ್ವಾನಾ ಲಾವುನ್ ದಿಲ್ಯಾತ.

4 ತುಮಿ ತಯಾರ್ ನಸ್ತಾಸಾತ ಎಕ್ ಯಳಿ ಮಕೆದೊನ್ಯಾತ್ಲೆ ಕೊನ್ತರಿ ಮಾಜಿ ಸಂಗ ಯವುನ್ ತುಮಿ ತಯಾರ್ ಜಾಲ್ಯಾನಸ್‌ಲ್ಯಾಲ ಬಗುನ್ ಆಮಾನಾ ತುಮ್ಮಿವ ಆಸ್ಲಾ ಇಸ್ವಾಸ್ ಥೆವ್‌ಲ್ಯಾ ಮನ್ವುನ್ ಮನಾ ಲಾಜ್ವಾಟಲ್; ತುಮಾನಾಬಿ ಲಾಜ್ವಾಟಲ್ ಮನ್ವುನ್ ಮೀ ಆಸಾ ಸಾಂಗ್ಲೊ.

5 ಆಸ ಆಸ್ತಾನಾ ಹೆ ಭನ್ನಿ ಭಾಹು ಆಂದಿಸ್ ತುಮ್ಮಿಪ ಯವುನ್ ತುಮಿ ಆಂದಿಸ್ ದಿಲ್ಯಾಲ್ಯಾ ಸಬ್ಬಾಚಿ ದಿನ್ನಿ ಗೊಳಾಕರಾಯಾ ತುಮಾನಾ ಮಜತ್ ಕರಾಯಾಸಾಟಿ ಹ್ಯಂಚಿಪ ಮಾಗಾಚೆ ವ್ಹಯಿಜಾಲ್ಯಾ ಮನ್ವುನ್ ಮನಾ ದಿಸತ್ಯಾ ಆಸ ಉಮೆದಿನಿ ದಿಲ್ಯಾಲಿ ದಿನ್ನಿ ವ್ಹತಿ.

6 ಫನ್ ಥೊಡ ಪೆರ್ನಾರಾ ಥೊಡಸ್ ಕ್ಯಾಪ್ಪಾರ್. ಖುಬ್ ಪೆರ್ನಾರಾ ಖುಬ್ ಕ್ಯಾಪ್ಪಾರ್. ಹೈತುಮಾನಾ ರಾವ ರಾಹುನಿ.

7 ಪರತೆಕಾನಿ ಆಪ್ಲ್ಯಾ ಆಪ್ಲ್ಯಾ ಮನಾತ್ ಥರಿವ್ಲ್ಯಾ ತಸ ದಿವುನಿ; ದುಖಾನಿ ವ್ಹವುನಿ ಬಳ್‌ಜುರಿನಿ ವ್ಹವುನಿ ಟುರ್ಟುರುನ್ ವ್ಹವುನಿ ಕುನಿಸ್ ದಿವುನಾಹಿ; ಕಾ ಮಂಜೆ ಹೌಸನಿ ದೆನಾರ್ಚ್ಯಾಚಿ ದೇವ್ ಮಾಯಾ ಕರ್ನಾರ್.

8 ದೇವ್ ಸಗ್ಳೆ ತರಚಾ ದಾನ್ ತುಮಾನಾ ಪುಕಟ್ ದೆನಾರಾ ಜಾಲ್ಯಾ ಮನ್ಡುನ್, ತುಮಿ ಕವಾಬಿ ಸಗ್ಳೆ ಗುಸ್ಪಿತ್ಲಿ ಸಂಪನ್ ವ್ಹವುನ್ ಸಗ್ಳೆ ಮಜ್ಬತಿಚಿ ಕಾಮ ಪುಕಟ್ ಕರಾಯಾ ವ್ಹಯಿಸಾ.

9 ಪವಿತ್ರ ಪುತಿಕಾತ್ ಆಸ ಲಿವ್ಲ್ಯಾ ತ್ಯೊ ಗರಿಬಾನಾ ಉದಾರ್ ದೆನಾರ್;

ತ್ಯಚಿ ನೀಯತ್ ಶಾಸ್ವತ್ ರಾನಾರ್.

10 ಪೆರ್ನಾರ್ಚ್ಯಾ ಬೀ, ಖಾನಾರ್ಚ್ಯಾ ಜೆವಾನ್ ದೆನಾರಾ ತುಮಾನಾಬಿ ಪೆರಾಯಾ ಬೀ ದಿವುನ್ ತ್ಯೆ ಖುಬ್ ಕರುನ್ ತುಮಚಾ ಚಾಂಗಲ್ಯಾ ಕಾಮಾನಿ ವ್ಹನಾರ ಫಳ ವಾಡಿವ್ಪಾರ್.

11 ಆಸಸ್ ತುಮಿ ಸಗ್ಳೆ ಗುಸ್ಪಿತ್ಲಿ ಸಾವ್ಕಾರ್ ವ್ಹವುನ್ ಉದಾರ್ ದಿಯಾ ವ್ಹನಾರ್ ನಾಹಿತ ತುಮಚ್ ಉದಾರ್ ದೆನ ಆಮ್ಚಾ ಹಾತಾತ್ಲಿ ಆನಿ ಯಕಾಲಾ ಗಾವ್ಲತ ತ್ಯೆ ದೇವಾಲಾ ಉಪ್ಕಾರ ಸ್ತುತಿ ಉತ್ಪನ್ ಕರ್ತ.

12 ಕಸ ಮಂಜೆ ತುಮಿ ಕರ್ತ್ಯಾಲ ಹೈ ಚಾಂಗ್ಲ ಕಾಮ್ ದೇವಾಚಾ ಪೊರಾಚಾ ತರಾಸ್ ಕ್ಯಾಡ್ನಾರ್ ನಾಹಿತ ಖುಬ್ ತರನಿ ದೇವಾಲಾ ಉಪ್ಕಾರ್ ಸ್ತುತಿ ಉತ್ಪನ್ ಕರಾಯಾ ಹೈಲಾ ಕಾರನ್ ವ್ಹನಾರ್.

13 ತುಮಿ ಕರ್ನಾರಿ ಹ್ಯೊ ಮಜ್ಬತ್ ಆನಿ ತುಮಚ್ ಚಾಂಗ್ಲ ಮನ್ ಖುಬ್ ಜನಾಂಚಾನಿ ಬಕ್ತಾನಾ, ತುಮಿ ಕೆಲ್ಯಾಲ್ಯಾ ಕಾಮಾ ಶಾರ್ಕ, ಕ್ರಿಸ್ತಾಚೆ ಬರೆ ಖಬ್ರಿ ಶಾರ್ಕ ಚಾಲ್ತಾಸಾ ಮನ್ಡುನ್, ತ್ಯೆನಾಬಿ ಆನಿ ಸಗ್ಳಾಳಾನಾಬಿ ತುಮಿ ಉದಾರ್ ದೆತ್ಯಾಲ್ಯಾಚಿ ತಿ ದೇವಾಲಾ ಮರ್ಯಾದ್ ಆನ್ವಾರ್.

14 ತಸಸ್ ತುಮ್ಮಿಸಾಟಿ ಖುಬ್ ಮನಾನಿ ಮಾಗ್ನ್ ಕರ್ತ್ಯಾತ ಮನ್ಹುನ್ ದೇವಾಚಿ ಖುಬ್ ಕ್ರುಪಾ ತುಮಾನಾ ಗಾವ್ಲೆ ಮನ್ಹುನ್ ತಿ ತುಮಾನಾ ಬಿಗಾಯಾ ಮನ್ ಕರ್ತ್ಯಾತ.

15 ಸಾಂಗಾಯಾ ವ್ಹಯಿತ್ನಾಹಿ ಆಸಲ್ಯಾದಾನಾಸ್ ಲಾಗುನ್ ದೇವಾಲಾ ಸ್ತುತಿವ್ಹವುನಿ.

10

ಆತ್ಮಿಕ್ ಯುದ್

1 ಪೌಲ್ ತುಮ್ಮೆ ಸಂಗ ಆಸ್ತಾನಾ ಥಂಡ್ಪನಾನಿ ವಾಗ್ಣೊ ದುರ್ ಆಸ್ತಾನಾ ಆಮ್ಮೆ ಗುಸ್ತಿತ್ ಕಡಕ್ಪನಾನಿ ವಾಗ್ಣಾರಾ ಜಾಲ್ಯಾಲಾ ತ್ಯೊ ಪೌಲ್ ಮಂತ್ಯಾಲಾ ಮೀ ಕ್ರಿಸ್ತಾಚ ಥಂಡ್ ಆನಿ ಸಾಧು ಮನಾನಿ ಇನಂತಿ ಕರ್ತೊ,

2 ಕೊನ್ ಆಮಾನಾ ಲೊಕಾಚೆಗತ್ ಜೀವ್ನಾ ಕರ್ನಾರಿ ಮಂಥ್ಯಾತ ತ್ಯಂಚಿ ಸಂಗ ಕಡಕ್ಪನಾನಿ ರಾಹ್ಯಾವ್ಹಯಿ ಮನ್ಹುನ್ ಮಂತ್ಯೊ ಆಮಿ ತುಮ್ಮಿ ಸಂಗ ಆಸ್ತಾನಾ ತಸ್ಲೆ ಕಡಕ್ಪನ್ ದಾವಾಚಿ ಗರಜ್ ಯವುನಾಹಿ ಮನ್ಹುನ್ ತುಮ್ಮಿಪ ಇನಂತಿ ಕರ್ತೊ.

3 ಆಮಿ ಶರೀರಾನಿ ಆಸ್ಲಾವ್ತರಿ ಶರೀರಾನಿ ಲಡಾಯಿ ಕರ್ನಾರ ನವ್ವ

4 ಆಮಿ ವಾಪರ್ನಾರಿ ಸಾಮ್ನ ಶರೀರಾತ್ಲಿ ನವ್ವತ. ತೀ ದೇವಾಚಾ ಲೆಕ್ಯಾತ್ ಬಳಾಚಿ ಗ್ವಾಡಿ ಪಾಡುನ್ ಗ್ಯಾಲ್ವಾರಿ ಜಾಲ್ಯಾತ. ಆಮಿ ದೇವಾಚಾ ಗಿನ್ಯಾನ್ಯಾಚೆ ಆಡ್ವ ಉಟ್ಕಾರ ವಾದ್ ನಾಹಿಕರುನ್,

5 ಆನಿ ದೇವಾಚಾ ಗಿನ್ಯಾನಾಸಾಟಿ ಆಡ್ವ ವ್ಹವುನ್ ಉರ್ಬಾಲ್ಯಾ ಘಮೆಂಡಿಚಾ ಬೊಲ್ಯಾ ಸರ್ವನಾಶ್ ಕರುನ್ ಪ್ರತೀಕ್ ಯಕ್ ಯೊಜ್ವಾತ್ ಕ್ರಿಸ್ತಾಲಾ ವಿದೆಯ್ ವ್ಹಯಾಲಾ ಕರ್ತ,

6 ತುಮಚ್ ಐಕ್ವ ಪುರ್ನಭಾಲ್ಯಾ ನಂತರ್ ಸಗ್ಳೆ ಐಕ್ವ ನಸ್ಲ್ಯಾಲ್ಯಾ ಸಗ್ಳಾನ್ ಶಿಕ್ಷಾ ದಿಯಾ ತಯಾರ್ ಹಾವ್.

7 ತುಮಿ ಡೊಳ್ಳಾಮೊರ್ಡ್ ಹಾತ್ಯ ಬಗಾ. ಕೊನ್ತರಿ ಆಪ್ಲು ಕ್ರಿಸ್ತಾಚಾ ವ್ಹಯ್ ಮನ್ಲಾಲ್ಯಾ ತ್ಹನಿ ಆಪ್ಲು ಕಸಾ ಕ್ರಿಸ್ತಾಚಾ ತಸ ಆಮಿ ಕ್ರಿಸ್ತಾಚ್ ಮನ್ಹುನ್ ಸಮಜುನ್ ಗಿಹುನಿ.

8 ಆಮಾನಾ ಆಸ್‌ಲ್ಯಾಲ್ಯಾ ಹುಮ್ಕಾಚೆ ಗುಸ್ತಿತ್ ಆಮಿ ಯೆಕ್ ಯೆಳಿ ಖುಬ್ ವವ್ಯಾಳತ ತಸ ವವ್ಯಾಳ್‌ತ್ಯಾಲ್ಯಾತ್ ಲಾಜ್‌ತ್ಯಾಹಿತ. ಫನ್ ತುಮಾನಾ ಪಾಡಾಯಾ ಸಾಟಿನವ್ವಬಾಂದಾಯಾ ಸಾಟಿಸ್ ಪ್ರಭುನಿ ಹ್ಯೊ ಹುಕುಮ್ ಆಮಾನಾದಿಲ್ಯಾ.

9 ಮೀ ಪತರ್‌ಯಾನ್ ತುಮಾನಾ ಭ್ಯಾ ಗ್ಯಾಲ್ಯೊ ಮನ್ವುನ್ ಸಮಜುನ್ ಗಿಹುನಕೊಸಾ.

10 ತ್ಯಚಿಪ್ಪಿ ಆಲ್ಯಾಲಿ ಪತ್ರಿ ಕಟುರ್ ಆನಿ, ಕಡಕ್ ಜಾಲ್ಯಾತ. ಫನ್ ಶರೀರಾನಿ ತ್ಯಬಳ್ ಮೊಡಾ ತ್ಯಚಾ ಬೊಲ್ಯಾ ಐಕಾಯಾ ಬರ್‌ಯಾ ನಾಹಿತಾ ಆಸಿ ಥುಡಿಭನ ಸಾಂಗ್‌ತ್ಯಾತ ನವ್ವ.

11 ತಸ್ಲಿ ಆಮಿ ದುರ್ ಆಸ್ತಾನಾ ಪತರ್‌ಯಾಂಚಾನಿ ಬುಲಿಲಾ ಕಸ್ಲಿಹಾವ್ ಮನ್ವುನ್ ಭವಳ್ ಆಸ್ತಾನಾ ಕಾಮಾತ್ ತಸ್ಲಿಸ್ ಹಾವ್ ಮನ್ವುನ್ ಸಮಜುನ್ ಗೆವ್ವಾ.

12 ಆಪ್‌ಲ್ಯಾಲಾಸ್ ಆಪ್ಣು ವವ್ಯಾಳುನ್ ಗೆತ್ಯಾಲ್ಯಾ ಥೊಡ್ಯಾಂಚಾತ್ಲಿ ಆಮಾನಾ ಭೊಡ್ವಾಯಾ ವ್ಹಪುನಿ ತ್ಯಂಚಿ ಸಂಗ ಮಿಳ್ವಾಯಾ ವ್ಹಪುನಿ ಮಿ ಮನ್ ಕರಿತ್ಯಾಹಿ. ತೀ ತರಿ ಆಪ್ಲೆ ಆಪ್ಣು ಆಪ್ಲಾ ಮಾಪ್ ಕರುನ್ ಆಪ್‌ಲ್ಯಾನಾ ಆಪ್ಣು ಮಿಳ್ವುನ್ ಬುದ್ಧಿ ನಸ್‌ಲ್ಯಾಲಿ ಜಾಲ್ಯಾತ.

13 ಆಮಿತರಿ ಆಮ್ಚೆ ಮರ್‌ಯಾಚೆ ಬಾಹಿರ್ ವವ್ಯಾಳುನ್ ಗಿಹ್ಯಾಚೆ ಆಂದಿ ದೇವಾನಿ ಆಮಾನಾ ದ್ಯಾವಲ್ಯಾಲ್ಯಾ ಗೆರ್‌ಯಾತ್ ರಾಹುನ್ ವವ್ಯಾಳ್ತಾವ್. ಹ್ಯ ದ್ಯಾವ್‌ಲ್ಯಾಲ್ಯಾ ಗೆರ್‌ಯಾತ್ಲಿ ರಾಹುನ್ ತುಮ್ಮಿ ಪರತ್ ಆಲ್ಯಾವ್.

14 ಆಮಿ ಕ್ರಿಸ್ತಾಚಿ ಬರಿ ಖಬರ್ ಸಾಂಗಿತ್ ದುಸರ್‌ಯಾಂಚೆ ಆಂದಿ ತುಮ್ಮಿಪ ಆಲಾವ್ ಮನ್ವುನ್ ತುಮ್ಮಿಪ ಹುಕುಮ್ ನಸಲ್ಯಾಚಿಗತ್ ಗೆರ್‌ಯಾ ವಲ್ಯಾಂಡುನ್ ಜಾಯಿತ್ಯಾಹಿ. ಕ್ರಿಸ್ತಾಚಿ ಬರಿ ಖಬರ್ ಸಾಂಗಿತ್ ಆಮಿ ತುಮ್ಮಿಪ ಆಲ್ಯಾವ್ ನವ್ವ.

15 ಆಮಿ ಮರ್‌ಯಾದ್ ಸುಡುನ್ ಆನಿ ಯಕಾಚಾ ಕಾಮಾಚ್ ಫಳ ಗಿಹುನ್, ಹೀ ಆಮಿ ವವ್ಯಾಳುನ್ ಗಿಹಿತ್ಯಾಹಿ. ಫನ್ ತುಮಚಾ ಇಸ್ವಾಸ್ ವಾಡ್ತೊ ತವಾ ತುಮ್ಮಿಸ್ ಲಾಗುನ್ ಆಮ್ಚಾ ಕಾಮಾಚಿ ಮರ್‌ಯಾದ್ ಆನೀಕ್ ಪಗಾಳ್ತೆ.

16 ತುಮಾನಾ ಪಲಿಕ್ಲೆ ಸೀಮತ್ಲಿ ಬರಿ ಖಬರ್ ಸಾಂಗ್ತಾರ್ ಮನ್ವುನ್

ಆಶಾ ಹಾ. ಗಾಮಾನಿ ಆಮಾನಾ ಗಾವಲ್ಯಾಲ್ಯಾ ಫಳಾಚೆ ಗುಸ್ತಿತ್ ಆಮಿ ಮುಟಿ ಮನ್ವಿತ್ವಾಹಿ.

17 ಮೊಟಾ ಮನ್ವುನ್ ಗೆನಾರಾ ಪ್ರಭುಪಸ್ ಮೊಟಾ ಮನ್ವುನ್ ಗಿಹುನಿ. ಮನ್ವುನ್ ದರ್ಮಶಾಸ್ತ್ರಾರಾತ್ ಲಿವಲ್ಯಾ.

18 ಆಪ್ಲ್ಯಾಲಾಸ್ ಆಪ್ಣು ವವ್ಯಾಳುನ್ ಗೆನಾರಾ ಚಾಂಗ್ಲಾನವ್ವ ಪ್ರಭು ಕುನಾಲಾ ವವ್ಯಾಳೊ ತ್ಯೊಸ್ ಚಾಂಗ್ಲಾ.

11

ಪೌಲ್ ಆನಿ ಲಬಾಡ್ ಅಪೊಸ್ತಲ್

1 ಮೀ ಮನಾ ವವ್ಯಾಳುನ್ ಗೆನಾರ ಮಿಳಫನ್ ತುಮಿ ಜರಾ ಸುಸ್ಪುನ್ ಗಿಹಿತಾಸಾತ ಬರ ವ್ಹಯಿತ. ತುಮಿ ಮನಾ ಸುಸ್ಪುನ್ ಗೆವಾ.

2 ಕಾ ಮಂಜೆ ದೇವಾಪ ಆಸ್ಲ್ಯಾಲೆ ಕ್ಯಾಳ್ಜಿನಿಸ್ ಮೀ ತುಮ್ಚೆ ಗುಸ್ತಿತ್ ಕ್ಯಾಳ್ಜಿ ಕರ್ತೊ. ತುಮಾನಾ ಕ್ರಿಸ್ತ ಮಂತ್ಯಾಲ್ಯಾ ಯಕ್ಲ್ಯಾಸ್ ಗಡ್ಯಾಲಾ ಚಾಂಗ್ಲಿ ಕನ್ಯಾ ಕರುನ್ ದಿಯಾವ್ಹಯಿ ಮನ್ವುನ್ ತುಮಾನಾ ತ್ಯಲಾ ಥರಿವಲ್ಯಾ ನವ್ವ.

3 ಫನ್ ಕಸಿ ಹವ್ವಾ ಸಾಪಾಚೆ ಯವಜ್ಞಾತ್ ಗಾಹುನ್ ಫಸ್ಲಿತಸಿ ತುಮಚ್ ಮನ್ ಕ್ರಿಸ್ತಾಚೆ ಗುಸ್ತಿತ್ ವ್ಹಯಿಜ್ಞಾಲ್ಯಾಲಿ ಶುದ್ ಬಕ್ತಿ ಆನಿ ಸರಳ್ವನ್ ಸುಡುನ್ ಬಾದ್ ವ್ಹಸಿಲಾ ಮನ್ವುನ್ ಮನಾ ಭ್ಯಾವಾಟ್ಕಾ.

4 ಕಾ ಮಂಜೆ ಕೊನ್ತರಿ ಯವುನ್ ಆಮಿ ಶಿಕಿವಲ್ಯಾಲ್ಯಾ ಯೇಸುಲಾ ಸುಡುನ್ ಆನಿ ಯಕಾ ಯೇಸುಲಾ ತುಮಾನಾ ವಳಕ್ ಕರ್ತಾನಾ ನಾಹಿತ ತುಮಿ ಗೆತಲ್ಯಾ ನಸ್ಲ್ಯಾಲ ದುಸ್ರೆ ತರಚಾ ಆತಮ್ಯಾಚಾ ಹುಕುಮ್ ಗೆತಾನಾ, ತುಮಿ ಗಿಹ್ಯಾಚೆ ಆಂದಿ ಆಸ್ಲ್ಯಾಲ ಆನಿಯೆಕ್ ಚಾಂಗ್ಲಿ ಖಬರ್ ಐಕ್ತಾನಾಬಿ ತುಮಿ ಸುಸ್ಪುನ್ ಗೆತ್ಯಾಲ ಮಿಬ್ ವಿಚಿತ್ರ.

5 ಮಿಬ್ ಬರ ಅಪೊಸ್ತಲ್ ಮನ್ವುನ್ ಗೆತ್ಯಾಲ್ಯಾಂಚಿವ್ನಿ ಮೀ ಕಶಾತ್ ಕಮ್ಮಿನಾಹಿ ಆಸ ಮನಾ ವಾಟಿ

6 ಮೀ ಬೊಲಾಯಾ ಶಾನಾ ನಸ್ಲೊತರಿ ಗಿನ್ಯಾನಾತ್ ಕಮ್ಮಿನಾಹಿ. ಹ್ಯ ಸಗ್ಳೆ ತರನಿ ಯಳಾನಿ ದಾವುನ್ ದಿಲ್ಯಾ.

7 ತುಮಿ ವರ್ ಯಯಾ ವ್ಹಯಿಸಾ ಮನ್ಹುನ್ ಮನಾಸ್ ಮೀ ಖಾಲ್ ವ್ಹಪುನ್ ದೇವಾಚಿ ಬರಿ ಖಬರ್ ತುಮಾನಾ ಪುಕಟ್ ಸಾಂಗ್‌ಲ್ಯಾಲ್ಯಾತ್ ಪಾಪ್ ಕೆಲ ಕ್ಯಾ?

8 ತುಮ್ಚಿ ಸೇವಾ ಕರಾಯಾ ಸಾಟಿ ಮೀ ದುಸ್ರೆ ಸಭೆತ್ಲಿ ಮಜತ್ ಗೆತ್ಲೆ, ತುಮ್ಚಿಸಾಟಿ ದುಸ್ರೆ ಸಭೆತ್ಲಿ ಮಜುರಿ ಗೆತ್ಲೆಕ್ಯಾ.

9 ಮೀ ತುಮ್ಚಿಪ ಆಸ್ತಾನಾ ಖರ್ಚಾಲಾ ಕಾಯ್ ನಸ್‌ಲ್ಯಾಲ್ಯಾಯಳಾಲಾ ಕುನಾಲಾ ವಜ್ಜ ಜಾಲೊನಾಹಿ. ಮಕೆದೊನ್ಯಾತ್ಲಿ ಆಲ್ಯಾಲ ಬನ್ಲಿ ಬಾವ್ತಾಂಚಾನಿ ಮನಾ ಪಾಯೆತ್ಲೆದಿಲ. ಮೀ ತುಮಾನಾ ಕಶಾತುಸ್ ವಜ್ಜವ್ಹಪುನಾಹಿ ಮನ್ಹುನ್ ಹುತೊ. ಹಿತ್ಲಿ ಮೊರ್ಹಬಿ ರಾತೊ.

10 ಹ್ಯ ಮಾಜ್ ವವ್ಯಾಳ್ ಅಖಾಯಾತಲ್ಯಾ ಗಾವಾತ್ಲಿ ಯೊಕ್ಲಿ ಥಾಂಬಿವ್ಹಾರ್ನಾಹಿ ಮನ್ಹುನ್ ಕ್ರಿಸ್ತಾಚೆ ಮೊರ್ಹ ಖರ್ಚಾನಿ ಸಾಂಗ್ಲೊ.

11 ತುಮ್ಚಿಪ್ಲಿ ಮೀ ಕಾಯೆಕ್ ಗಿಹಿತ್ಲಾಹಿ ಕಾ? ತುಮ್ಚಿವ ಮಾಯಾ ನಾಹಿ ಮನ್ಹುನ್ ಕ್ಯಾ? ನಾಹಿ, ತುಮ್ಚಿವ ಮನಾ ಆಸ್‌ಲ್ಯಾಲಿ ಮಾಯಾ ಕ್ಯವ್ಲಿ ಮನ್ಹುನ್ ದೇವಾಲಾಸ್ ರಾವಿಹಾ.

12 ಥೊಡ್ಯಾಂಚಾನಿ ಆಪ್ಲು ಕರ್ತ್ಯಾಲಿ ಕಾಮ, ಆಮಿ ಅಪೊಸ್ತಲ್ ವ್ಹಪುನ್ ಕರ್ತ್ಯಾಲ್ಯಾ ಕಾಮಾಲಾ ಶಾರ್ಕ್ ಮನ್ಹುನ್ ವಾದ್ ಕರಾಯಾ ಅವ್ಕಾಸ್ ಗಾವ್ತೊಕ್ಯಾ ಬಗ್‌ತ್ಯಾತ್. ಶೊತ್ಯಾಲ್ಯಾನಾ ಕಸ್ಲಾಸ್ ಅವ್ಕಾಸ್ ಗಾಹುನಾಹಿ ಆಸಾ ಮೀ ಆತಾ ಕರ್ತ್ಯಾಲಸ್ ಚಾಲ್ವಿತ್ ಜಾತೊ.

13 ಫನ್ ತಸ್ಲ ಲಬಾಡ್ ಅಪೊಸ್ತಲ್, ಗಾತ್ ಕರ್ತ್ಯಾಲ್ಯಾ ಕಾಮಾಚ್, ಕ್ರಿಸ್ತಾಚ್ ಅಪೊಸ್ತಲ್ ವ್ಹಪುನ್ ದಿಸಾಯಾ ರುಪ್ ಜಾಲ್ಯಾತ್.

14 ಹ್ಯ ಕಾಯ್ ಚಮತ್ಕಾರ್ನವ್ ಸೈತಾನ್ ಆಪ್ಲುಸ್ ಉಜೀಡಾಚಾ ದೇವ್ ದುತಾಚ್ ರುಪ್ ಗ್ಯಾಲ್ತಾನಾ,

15 ತ್ಯಚ್ ಸೇವಕ್ ಸಾಯಿತ್ ನೀಯತಿಲಾ ಸೇವಕ್ ವ್ಹಪುನ್ ದಿಸಾಯಾ ರುಪ್ ಗಾಲಾಚ್ ಚಮತ್ಕಾರ್ ಕಾಯ್ ನವ್ವ ತ್ಯಚಿ ಶೆವಟ್ ತ್ಯಚಾ ಕಾಮಾ ಶಾರ್ಕಿನ್ ಹಾ.

ಅಪೊಸ್ತಲ್ ವ್ಹಪುನ್ ಪೌಲಾನಿ ಅನ್ಭವಸಲ್ಯಾಲಾ ತರಾಸ್

16 ಕುನಿ ಮನಾ ಖುಳಾ ಮನ್ವುನ್ ಸಮಜುನಾಹಿ ಮನ್ವುನ್ ಪರ್ತುನ್ ಸಾಂಗ್ತೊ. ತಸ ಸಮಜುನ್ ಗೆತ್ಲೆತರಿ ಚಿಂತಾನಾಹಿ. ಮನಾ ಖುಳಾ ಮನ್ವುನುಸ್ ಸಮಜುನ್ ಗೆವ್ವಾ ತವಾ ಮನಾ ಥುಡಿ ಮರಾಡ್ ಗಾವ್ವಲ್.

17 ಮೀ ಹ್ಯ ಬೊಲತ್ಯಾಲ ಪ್ರಭುಚಾ ಹುಕ್ಮಾಚೆಗತ್ ಬೊಲತ್ಯಾಹಿ ಇಸ್ವಾಸಾನಿ ಆಪ್‌ಲ್ಯಾಲಾ ವವ್ಯಾಳುನ್ ಗೆತ್ಯಾಲ್ಯಾ ಖುಳ್ಕಾಚೆಗತ್ ಬೊಲೆಲ್ಲೊ.

18 ಖುಬ್ ಜನ ದುನೆತಲ್ಯಾ ಕಾಮಾತ್ ವವ್ಯಾಳುನ್ ಗೆತ್ಯಾತ ಮನ್ವುನ್ ಮೀ ವವ್ಯಾಳುನ್ ಗೆಥೊ.

19 ತುಮಿ ಶಾನಿ ವ್ಹಪುನ್ ಖುಳ್ಕಾನಾ ಸಂತೊಶಾನಿ ಸುಸ್ಪುನ್ ಗೆತಾಸಾನವ್ವ.

20 ಯಕಾನಿ ತುಮಾನಾ ಆಪ್‌ಲ್ಯಾಲಾ ತಾಬ್ಯಾತ್ ಗೆತ್ಲೆತ, ಯಕ್‌ಲ್ಯಾನಿ ತುಮಾನಾ ಆಡ್‌ಕ್ಯಾವ್ಲಾತ್, ಯಕಾನಿ ತುಮಾನಾ ಪಸ್ಪುನ್ ದರ್ಲೆತ, ಯಕಾನಿ ಆಪ್ಲ ಥೊರ್ಲೆಫನ್ ಸಾಂಗ್ಲೆತ, ಯಕಾನಿ ತುಮ್ಜಾ ತೊಂಡಾವ ಮ್ಯಾರ್ಲಾತರಿ ಸುಸ್ಪುನ್ ಗೆತಾಸಾ ನವ್ವ.

21 ಆಮಿ ಬಳ್ ನಸಲ್ಯಾಲಿ ಹಾವ್ ಮನ್ವುನ್ ಹಿನವುನ್ ಸಾಂಗ್ತೊ. ಕಸ್‌ಲ್ಯಾಸ್ ಆಧಾರಾನಿ ಕೊನ್ ತರಿ ಬಡಾಯಿ ಮನ್ವುನ್ ಗೆತೊ ತ್ಯನಿಸ್ ಮೀ ವವ್ಯಾಳಾಯಾಸಾಟಿ ಖುಳ್ಕಾಚೆಗತ್ ಬೊಲೆಲ್ಲೊ.

22 ತೀ ಇಬ್ರಿಯ ಕ್ಯಾ? ಮೀ ಇಬ್ರಿಯಾ. ತೀ ಇಸ್ರಾಯೇಲ್ ಕ್ಯಾ? ಮೀ ಇಸ್ರಾಯೇಲ್. ತೀ ಅಬ್ರಹಾಮಾಚಾ ವಂಶಾತ್ಲಿ ಕ್ಯಾ? ಮೀ ತ್ಯಾಸ್ ವಂಶಾತ್ಲಾ.

23 ತೆ ಕ್ರಿಸ್ತಾಚೆ ಸೇವಕ್ ಕ್ಯಾ? ತ್ಯಂಚಿವ್ನಿ ಮೀ ಖುಬ್ ಸೇವಾ ಕರ್ನಾರಾಜಾಲ್ಯೊ. ಮೀ ಖುಳ ದರ್ಲ್ಯಾಚೆಗತ್ ಬೊಲೆಲ್ಲೊ ಕ್ರಿಸ್ತಾಚಿ ಸೇವೆ ತ್ಯಂಚಿವ್ನಿ ಖುಬ್ ಕೆಲೆ, ಖುಬ್ ಖೆಪಾ ತುರುಂಗಾತ್ಪಿರಾಯ್ಲೊ, ಖುಬ್ ತಡಾಕ ಖಾಲ. ಖುಬ್ ಖೆಪಾ ಮರ್ನಾತ್ ಗಾವ್ಲೊ ಹುತೊ.

24 ಪಾಚ್ ಕೆಪ್ಪಾ ಯೆಹುದ್ಯಾಂಚಾಪ್ಪಿ ಮನಾ ಎಕ್ ಕಮ್ಮಿ ಚಾಳಿಸ್ ತಡಾಕ ಬಸ್ಲೆ.

25 ತಿಂದಾ ಟೊನ್ಯಾನಿ ಮನಾ ಮ್ಯಾರ್ಲಾ. ಯಂಗ್ಡಾ ಮಾಜಿವ ದೊಂಡ

ಮ್ಯಾಲ. ತಿಂದಾ ಮೀ ಆಸ್‌ಲ್ಯಾಲಿ ವ್ಹಡಿ ಪುರುನ್‌ಗೆಲಿ. ಎಕ್ ರ್ಯಾತ್ ಎಕ್ ದಿಸ್ ಸಮೀಂದೊರಾತ್ ಪಾನ್ಯಾತ್ ಕ್ಯಾಡ್ಲ.

26 ಕ್ರಿಸ್ತಾಚೆ ಸೇವೆತ್ ಕಿತಿಕಿ ಪ್ರಯಾನ್ ಕೆಲ. ನ್ಹಚ್ ದೊಖ, ದುಸ್ಮರಾಚ್ ಚೊರಾಂಚ್ ದೊಖ, ಆಪ್‌ಲ್ಯಾಯೆಹುದಿ ಲೊಕಾಂಚ್ ದೊಖ, ಯೆಹುದಿ ನಸ್‌ಲ್ಯಾಲ್ಯಾ ಲೊಕಾಂಚ್ ದೊಖ ಪೆರತ್ಲಿ ದೊಖ, ಲೊಕ ನಸ್‌ಲ್ಯಾಲ್ಯಾ ಜಾಗ್ಯಾವ ದೊಖ, ಸಮೀಂದೊರಾತ್ ದೊಖ, ಲಬ್‌ಡ್ಯಾ ಬನ್ದಿ ಬಾವ್ಪಾಚಿ ದೊಖ ಮನಾ ಆಲ.

27 ಫಾಮ್ ಗಳ್ವುನ್ ರಾಬ್ಲೊ ಕೃಪ್ತಿ ಕೆಪ್ಪಾ ಜಾಗ್ರಾನ್ ಕಿಲಿ; ಬುಖತಾನಚಾ ರಾಯ್ಲೊ; ಖುಬ್ ಖೆಪಾ ಆಸ್ರಾ ನಸ್ಥಾನಾ ಜೇವಾನ್ ನಸ್ಥಾನಾ, ಕಪ್ಪ ನಸ್ಥಾನಾ ಪಿರ್ಲೊ; ಥಂಡಿ ವಾರ್ಯಾತ್ ಉಗ್ಡಾರಾಯ್ಲೊ.

28 ಆಸ್‌ಲ್ಯಾ ಆನಿ ಇತ್‌ಕ್ಯಾ ದುಸ್ಮರಾ ಗುಸ್ಪಿ ನಾಹಿತ, ಸಗ್ಳೆ ಸಭೆಚಿ ಕ್ಯಾಳ್ಜಿ ದಿಸುನ್ ದಿಸ್ ಮನಾ ಜಾಚಿ.

29 ಕೊನ್ ತರಿ ಬಳ್ ನಸ್‌ಲ್ಯಾಲಾ ಜಾಲಾತ ಮೀ ತ್ಯಚಿ ಸಂಗ ಬಳ್ ನಸ್‌ಲ್ಯಾಲಾ ಜಾಲೊ ನಾಹಿ ಕ್ಯಾ? ಕೊನ್ ತರಿ ಚುಕುನ್ ಗೆಲಾತ ಮನಾ ದುಖ್ ನಾಹಿ ಕ್ಯಾ?

30 ಮೀ ವವ್ಯಾಳುನ್ ಗಿಹ್ಯಾಚ್ ಜಾಲಾತ ಮಾನಾ ಬಳ್ ನಸ್‌ಲ್ಯಾಲ್ಯಾಲಾಸ್ ವವ್ಯಾಳೊ.

31 ಮಾಜಾ ಬೊಲ್ಯಾ ಲಬಾಡ್ ನವ್ತಾ ಮನ್ವುನ್ ಆಮ್ಚಾ ಪ್ರಭು ಯೇಸು ಕ್ರಿಸ್ತಾಚಾ ದೇವ್, ಬಾ ಜಾಲ್ಯಾಲಾ ಖಾಯಿಮ್ ಸ್ತುತಿ ಗೆನಾರಾ ದೇವ್ ಮನ್ವುನ್ ರಾವಾ ಹಾ.

32 ದಮಸ್ಕಾತ್ ರಾಜಾ ಜಾಲ್ಯಾಲ್ಯಾ ಅರೇತಾಚಾ ತಾಬ್ಯಾತ್ ಆಸ್‌ಲ್ಯಾಲಾ ಅಧಿಪತಿ ಮನಾ ದರಾಯಾವ್ಹಯಿ ಮನ್ವುನ್ ದಮಸ್ಕಾಚಿ ಪ್ಯಾಟ್ ರ್ಯಾಖತಾ ಆಸ್ತಾನಾ

33 ಮನಾ ಎಕ ಬುಟ್ಟೆತ್ ಬಸ್ಪುನ್ ಬಿಧಿಚೆ ಕಿಡಕಿತ್ಲಿ ಖಾಲ್ ಉತರ್ಲಾ ಹುತ್ತಾ. ಆಸ ತ್ಯಚಾ ಹಾತಾತ್ಲಿ ನಿಸ್ಪುನ್ ಪಳುನ್ ಗೆಲೊ.

ಪೌಲಾಚ್ ದರ್ಶನ್ ಆನಿ ಪ್ರಕಟನ್

¹ ವವ್ಯಾಳುನ್ ಗಿಹ್ಯಾಚಿ ಬರನವ್ನ್ ಫನ್ ವವ್ಯಾಳುನ್ ಗಿಹ್ಯಾಚಿ ಮನಾ ಅವಶ ಭಾಲ್ಯಾ ಮನ್ವುನ್ ಪ್ರಭುನಿ ಮನಾ ದಿಲ್ಯಾಲಿ ದರ್ಶನ್ ಆನಿ ಸಾಂಗ್ಯಾಲ್ಯಾ ಖರ್ಚಿ ಗುಟಾಚೆ ಗುಸ್ತಿತ್ ಸಾಂಗ್ತೊ.

² ಕ್ರಿಸ್ತಾಪ ಆಸ್ಲಾಲ್ಯಾ ಯೊಕ್ ಮಾನುಸ್ ತಾವಾ ಹಾ. ತ್ಯೊ ಚವ್ತಾ ವರ್ಸಾಚೆ ಮಾಗ ತಿನವ್ಯಾ ಸ್ವರ್ಗಾತ್ ನೆಲಾ. ತ್ಯೊ ಶರೀರಾ ಸಕಾಟ್ ನೆಲಾಕ್ಯಾ ಶರೀರ್ ಸುಡುನ್ ನೆಲಾ ಮನಾ ತಾವನಾಹಿ, ದೇವಾಲಾಸ್ ತಾವ.

³ ತ್ಯಾ ಯಳಾತ್ ತ್ಯೊ ಶರೀರಾ ಸಾಹಿತ್ ಹುತಾಕ್ಯಾ ಶರೀರ್ ನಸ್ತಾನಾ ಹುತಾ ಮನಾ ತಾವನಾಹಿ, ದೇವಾಲಾಸ್ ತಾವಹಾ.

⁴ ತ್ಯೊ ಪರದೈಸಿ ಪರತ್ ನಿವ್ವುನ್ ಮಾನ್ಸಾಚಾನಿ, ಬೊಲಾಯಾ ಯವುನಾಹಿ ಆಸ್ಲಾ ಬೊಲ್ಯಾ ಐಕಲ್ಯಾ ಮನ್ವುನ್ ತಾವ ಹಾ.

⁵ ತ್ಯಚೆ ಗುಸ್ತಿತ್ ಮನಾ ಅಬಿಮಾನ್ ಹಾ. ಫನ್ ಮಾಜೆ ಗುಸ್ತಿತ್ ಮನಾ ಬಳ್ ನಸ್ಲಾಲ್ಯಾ ಸುಡುನ್ ದುಸ್ರ ವವ್ಯಾಳ್ಳ ಕಾಯ್ ನಾಹಿ.

⁶ ವವ್ಯಾಳುನ್ ಗಿಹ್ಯಾ ಮನಾ ಮನ್ ಆಸ್ಲತರಿ ವವ್ಯಾಳುನ್ ಗೆತ್ಯಾಲ್ಯಾತ್ ಮೀ ಖುಳಾ ವ್ಹಯಿತ್ಪಾಹಿ, ಕಾ ಮಂಜೆ ಮೀ ಖರತ್ಯ ಸಾಂಗ್ತೊ. ತರಿ ಕೊನ್ ಮನಾ ಬಗ್ತೊ ನಾಹಿತ ಐಕ್ತೊ ತ್ಯನಿ ಮನಾ ಆಗಾವ್ ಮನ್ವುನಾಹಿ.

⁷ ಹ್ಯಾ ಕಾರ್ನಾನಿಸ್ ಆನಿ ಮನಾ ಸಾಂಗಲ್ಯಾಲ್ಯಾ ಗುಟ್ ಖುಬ್ ವ್ಹಯಿಜಾಲ್ಯಾತ್ ಮನ್ವುನ್ ಮೀ ವವ್ಯಾಳಾಚೆ ಆಂದಿ ಗಪ್ರಾತೊ. ಸಾಂಗ್ನ್ಯಾಚೆ ಉಮೆದಿನಿ ಮೀ ಮನಾ ಖುಬ್ ಕರುನ್ ವವ್ಯಾಳುನ್ ಗಿಹುನಾಹಿ ಮನ್ವುನ್ ಯೊಕ್ ಕಾಟಾ ಮನಾ ಬೊಳಾಯಾ ಸಾಟಿ ಮಾಜಾ ಶರೀರಾತ್ ಥೆವ್ಲ್ಯಾ ಮೀ ಬಡಾಯಿ ಕರುನಾಹಿ ಆಸ ಹ್ಯ ಮನಾ ಬೊಳತ್ ಸೈತಾನಾಚಾ ದುತಾಚೆಗತ್ ಗುಸ್ಸ ಮಾರೀತ.

⁸ ಹ್ಯೊ ವಾದಿ ಮನಾ ಸುಡುನ್ ಜಾವುನಿ ಮನ್ವುನ್ ತಿಂದಾ ಪ್ರಭುಪ ಮಾಗ್ನ ಕೆಲ.

⁹ ಫನ್ ತ್ಯಲಾ ತ್ಯನಿ, “ಮಾಜಿ ಕ್ರಪಾ ತುಲಾ ಪುರ, ತುಜಿ ಬಳ್ ನಸ್ತಾನಾಸ್ ಮಾಜಿ ಬಳ್ ತುಜಿಪ ರಾಹ್ಯಾವ್ಹಯಿ” ಮನ್ವುನ್ ಮನಾ

ಸಾಂಗ್ಲ ತವಾ ಕ್ರಿಸ್ತಾಚ್ ಬಳ್ ಮನಾ ಹಾ ಮನ್ವುನ್ ಮಾಜ್ ಬಳ್ ನಾಹಿ ತ್ಯಲಾ ಮಿ ಖುಬ್ ಸಂತೊಶ್ ವ್ಹನಾರ್. ” ಹ್ಯಚಿ ಸಾಟಿ ಕ್ರಿಸ್ತಾಚ್ ಬಳ್ ಮಾಜಿಪ ರಾಹುನಿ.

10 ಮನ್ವುನ್ ಕ್ರಿಸ್ತಾಸ್ ಲಾಗುನ್ ಮನಾ ಬಳ್ ನಸ್‌ಲ್ಯಾಲ, ನಕ್ವಾಟ್, ಕಮ್ಮಿ ತರಾಸಾತ್ಪಿ ಆನಿ ಕಷ್ಟ ಆಲಾತರಿಬಿ ಸಂತೊಶಾನಿ ಹಾ. ಕಾ ಮಂಜೆ ಮೀ ಕವಾ ಬಳ್ ನಸ್‌ಲ್ಯಾಲಾ ಆಸ್ತೊ, ತವಾಸ್ ಬಳ್ ಆಸ್ತಾರಾ ವ್ಹತೊ.

ಕೊರಿಂಥಾ ಸಭೆಚೆ ಗುಶ್ಟಿತ್ ಪೌಲಾಚಿ ಚಿಂತಾ

11 ಮೀ ಆಸ ಲಿವುನ್, ಖುಳಾಜಾಲ್ಯೊ! ತ್ಯಲಾ ತುಮಿಸ್ ಮನಾ ಬಳಜುರಿ ಕಿಲಿಸಾ. ತುಮ್ಮಿಪ್ಪಿ ಮನಾ ವವ್ಯಾಳ್ ವ್ಹಯಾವ್ಹಯಿಹುತ, ಕಾ ಮಂಜೆ ಮೀ ಖಾಲಿ ಖಾಲ್ವಾಜಾಲೊತರಿ ಖುಬ್ ಚಾಂಗ್ಲ, ಅಪೊಸ್ತಲ್ ಮನ್ವುನ್ ಗೆತ್ಯಾಲ್ಯಾವ್ಹಿ ಕಶಾತ್ ಕಮ್ಮಿನವ್ಹ.

12 ಮೀ ತರಾಸ್ ಕವಾಬಿ ಸುಸ್ಪುನ್ ಗೆತ್ಯಾಲ್ಯಾತ್, ದ್ರಸ್ತಾವಾಚಿ ಕಾಮ ಆನಿ ಚಮತ್ಕಾರಿಚಿ ಕಾಮ, ತಸಸ್ ಮೊಟ್ಟಿ ಕಾಮ ಚಾಲಿವಲ್ಯಾಲ್ಯಾತ್ ಯಕಾ ಅಪೊಸ್ತಲಾಲಾ ರಾಹ್ಯಾವ್ಹಯಿತ್ಯಗುನ್ ತುಮ್ಮೆ ಮದ್ದಿ ಗಡ್ಲಿತ ನವ್ಹ.

13 ಮನಾ ಬಾಳಗಾಚ್ ವಜ್ಜ ಮೀ ತುಮ್ಮಿವ ಗ್ಯಾತ್ಲನಾಹಿ ಮನ್ಯಾಚೆ ಯಕಸ್ ಗುಸ್ತಿತ್ ಸುಡುನ್ ಆನಿ ಕಸ್ಲೆ ಗುಸ್ತಿತ್ಪಿ ತುಮಾನಾ ದುಸ್ರೆ ಸಭೆತ್‌ಲ್ಯಾವ್ಹಿ ಕಮ್ಮಿ ಕೆಲನಾಹಿತ ನವ್ಹ? ಮಾಜಿ ಹೀ ಭುಕ್ ಮಾಪ್ ಕರಾ.

14 ಬಗಾ ಮೀ ತುಮ್ಮಿಪ್ಪ ತಿನ್‌ವ್ಯಾನಿ ಯಯಾ ತಯಾರ್ ಹಾ ಆನಿ ತುಮಾನಾ ವಜ್ಜವ್ಹಯಿತ್ಯಾಹಿ. ಮೀ ತುಮ್ಮಿಪ್ಪಿ ಕಾಯ್ ಜೊಡಾಯಾ ನಕೊ ತುಮಾನಾಸ್ ಜೊಡಾಯಾ ವ್ಹಯಿತ. ಪೊರಾಂಚಾನಿ ಐಬಾಸಾಟಿ ಜೊಡಾಚ್ ದರ್ಮನವ್ಹ, ಐಬಾನಿ ಪೊರಾಂಚೆಸಾಟಿ ಜೊಡಾಚ್ ದರ್ಮ.

15 ಮೀತರಿ ಮನಾ ಆಸ್‌ಲ್ಯಾಲ ತುಮ್ಮ ಆತ್ಮ ರಾಕಾಯಾ ಸಾಟಿ ಖುಬ್ ಸಂತೊಶಾನಿ ಖರ್ಚ್ ಕರ್ತೊ; ಮನಾಸ್ ಖರ್ಚ್ ಕರ್ತೊ. ಮೀ ತುಮಾನಾ ಖುಬ್ ಮಾಯಾಕೆಲಿತ ತುಮಿ ಮನಾ ಕಮ್ಮಿ ಮಾಯಾ ಕರ್ನಾರ್ ಕ್ಯಾ?

16 ಫನ್ ಆಸ ಆಸ್ತಾನಾ, ಮೀ ತುಮಾನಾ ವಜ್ಜ ಜಾಲೊನಾಹಿ, ಫನ್ ಪಾರ್ಕಿನಿ ತುಮಾನಾ ಪಿತುರಿನಿ ದರ್ಲ ಮನ್ವುನ್ ಸಾಂಗಾ.

17 ಮೀ ತುಮ್ಮಿಪ ಲಾವುನ್ ದಿಲ್ಯಾಂಚಿಪ್ಪಿ ತುಮಾನಾ ಫಸ್ವನ್ ಕಾಯ್ ತರಿ ಕಾಡುನ್ಲೆಕ್ಲ ಕ್ಯಾ?

18 ತುಮ್ಮಿಪ ಜಾಯಾ ಮೀ ತೀತಾಪ ಮಾಗ್ಲತ್ಯಚಿ ಸಂಗ ತ್ಯಾಬಾವ್ತಾಲಾ ಲಾವುನ್ಲಿಲಾ, ತೀತಾನಿ ತುಮ್ಮಿಪ್ಪಿಫಸ್ವನ್ ಕಾಯ್ ತರಿ ಕಾಡುನ್ ಗೆತ್ಲ ಕ್ಯಾ? ಆಮಿ ದೊಗ ಯಕಾಸ್ ಮನಾನಿ ಚಾಲ್ತಾವ್ ನಾಹಿ ಕ್ಯಾ? ಆಮಿ ತಸಸ್ ಚಾಲ್ತಾವ್ ನಾಹಿ ಕ್ಯಾ?

19 ಆಮಿ ಯವ್ತಾ ಉಸಿರ್ ತುಮ್ಮೆ ಮೊರ್ಹ ಬೊಲ್ವಾರ ಮನ್ವುನ್ ಸಮಜುನ್ ಗೆತಾಸಾ ಕ್ಯಾ? ದೇವಾಚೆ ಮೊರ್ಹಸ್, ಆಮಿ ಕ್ರಿಸ್ತಾಪ ಆಸುನ್ ತುಮ್ಮಿ ಭಕ್ತಿ ವಾಡಾಯಾ ಸಾಟಿ ಬೊಲ್ವಾರ ಚಾಲ್ತಾವ್.

20 ಮೀ ಯತಾನಾ ಎಕ್ ಯಳಿ ತುಮಿ ಮನ್ ಕೆಲ್ಯಾ ಶಾರ್ಕ್ ಮೀ ದಿಸತ್ಪಾಹಿ ಕ್ಯಾ ಮಂತ್ಯಾಲ ಭ್ಯಾ ಮನಾ ಹಾ. ತಸಸ್ ಮೀ ಮನ್ ಕೆಲ್ಯಾ ಶಾರ್ಕ್ ತುಮಿ ದಿಸತ್ ನಾಹಿಸಾ ಕ್ಯಾ ಮನ್ಯಾಚ ಭ್ಯಾ ಮನಾ ಹಾ. ಯೆಕ್ ಯಳಿ ತುಮ್ಮಿಪ ಕಳ್, ಖೊಟಪನ್. ರಾಗ್, ಸ್ವಾರ್ತ್, ಚಾಡಿಸಾಂಗಾಚಿ, ಕಾನಾತ್ ಸಾಂಗಾಚಿ, ಗಮೆಂಡಿ ಗೊಂದೊಳ್ ರಾಹಿಲ್ ಮನ್ವುನ್ ಮನಾ ಆನ್ವಾನ್ ಹಾ.

21 ಮೀ ಪರ್ತುನ್ ಆಲೊಕಿ ಮಾಜಾ ದೇವ್ ತುಮ್ಮೆ ಗುಸ್ಪಿತ್ ಮನಾ ವಾಕಿವ್ವಾರ್ ಮನ್ವುನ್, ಆಂದಿಚೆಗತ್ ಪಾಪ್ ಕರುನ್, ಬಡಾಯಿ, ಶಾರೀರಿಕ್ ಸಂಬದ್, ಬುರ್ಸಕಾಮ್ ಕರುನ್ ಪಶ್ಚಾತ್ತಾವ್ ಪಡತ್ ನಸಲ್ಯಾಲ್ಯಾ ಖುಬ್ ಜನಾಂಚೆ ಗುಸ್ಪಿತ್ ಮೀ ದುಖ ಗಾಳಾಯಾ ವ್ಹಯಿತ ಮನ್ವುನ್ ಮನಾ ಭ್ಯಾ ಹಾ.

13

ಸರ್ತ ನಮಸ್ಕಾರ್ ಆನಿ ಹುಶಾರ್ಕಿ

1 ಮೀ ತುಮ್ಮಿಪ ತಿನ್ವ್ಯಾನಿ ಯತ್ಯೊ ಕಸ್ಲಾ ಗುನ್ನಾ ಆಸ್ಲಾತರಿ ತೈಲಾ ದೊಗಾ ತಿಗಾಚೆ ಸಾಕ್ಷಿಚಾ ಆಧಾರ್ ರಾಹ್ಯಾವ್ತಾಯಿ, ಮನ್ವುನ್ ಪವಿತ್ರ ಗ್ರಂಥಾತ್ ಲಿವ್ಲಾಲ ಹಾ.

2 ಮೀ ದೊನವ್ಯಾನಿ ತುಮ್ಮಿಪ ಆಸ್ತಾನಾ ಪರ್ತುನ್ ಆಲೊತ ತುಮಾನಾ ಶಿಕ್ಷಾ ದಿಯಾಚೆ ಆಂದಿ ರಾಹ್ಯಾಚೊ ನಾಹಿ ಮನ್ವುನ್ ಕಸ ಸಾಂಗ್ಲೆ, ತಸಸ್ ಆತಾಬಿ ತುಮಾನಾ: ಪೈಲಿ ಪಾಪಾಚಿ ಕಾಮ ಆಜುನ್ ಚಾಲಿವತ್ಯಾಲ್ಯಾನಾ ಆನಿ ದುಸರ್ಯಾನಾಬಿ ಸಾಂಗ್ಲೊ.

3 ಕ್ರಿಸ್ತ ಮಾಜಿಪ ಬೊಲ್ತೊ ಮನ್ವಾಯಾ ತುಮಿ ಸಾಕ್ಷಿ ಐಕ್ಲಿಸಾ ಮನ್ವುನ್ ಮೀ ಆಸಾ ಸಾಂಗ್ಲೊ. ತ್ಯೊ ತುಮ್ಮೆ ಗುಸ್ತಿತ್ ಬಳ್ ನಸ್ಲ್ಯಾಲಾ ವ್ಹಯಾಚೆ ಆಂದಿ ಬಳ್ ಆಸ್ಲ್ಯಾಲಾಸ್ ಜಾಲ್ಯಾ ಮೊಟಿ ಕಾಮ ತುಮ್ಮಿಪ ಕರ್ನಾರಾ ಜಾಲ್ಯಾ.

4 ತ್ಯ ಬಳ್ ನಸ್ತಾನಾ ಶಿಲ್ವೆತ್ ಗ್ಯಾತ್ಲಾ ಖರ; ಫನ್ ದೇವಾಚಾ ಬಳಾನಿ ಜಿತ್ಲಾ ಜಾಲಾ. ಆಮಿ ಸಾಹಿತ್ ತ್ಯಚ್ ಬಳ್ ನಸ್ಲ್ಯಾಲಾತ್ ವಾಟದಾರ್ ಜಾಲ್ಯಾವ್. ತರಿ ತ್ಯಚಿ ಸಂಗ ದೇವಾಚಾ ಬಳಾನಿ ತುಮ್ಮಿ ಸಾಟಿ ಜಗತ್ಯಾವ್.

5 ತುಮಿ ಕ್ರಿಸ್ತಾಚಾ ಇಸ್ವಾಸಾತ್ ಹಾಸಾ ಕ್ಯಾ ನಾಹಿಸಾ ಮನ್ವುನ್ ತುಮಚಿ ತುಮಿ ಪಾರಕ್ ಕರಾ, ತುಮ್ಮಿ ತುಮಿಸ್ ಪರಿಕ್ಷೆ ಕರಾ. ತುಮಿ ಚಾಂಗ್ಲೆ ಆಸ್ಲಾಸಾತ್, ಯೇಸು ಕ್ರಿಸ್ತ ತುಮ್ಮಿಪ ಹಾ ಮನ್ವುನ್ ಸಮಜ್ತಾಹಿ ಕ್ಯಾ? ತ್ಯೊ ತುಮ್ಮಿಪ ನಸ್ಲಾತ ತುಮಿ ತ್ಯ ಪರೀಕ್ಷೆತ್ ನಾಪಾಸ್ ಜಾಲ್ಯಾಸಾ.

6 ತುಮಿತರಿ ತೇ ಪರೀಕ್ಷೆತ್ ನಾಪಾಸ್ ವ್ಹಯಿತ್ ನಾಹಿಸಾ ಮನ್ವುನ್ ಮಾಜಿಯೆಕ್ ಆಶಾ ಹಾ.

7 ತುಮಿ ಬುರ್ಸ ಕಾಯ್ ಕರುನಾಹಿ ಮನ್ವುನ್ ಆಮಿ ದೇವಾಪ ಮಾಕ್ತಾವ್. ಹ್ಯಾತ್ ಆಮ್ಮಿಸ್ ತೇ ಪರೀಕ್ಷೆತ್ ಗಾವಲ್ಯಾಲ ಮನ್ವುನ್ ದಿಸುನ್ ಯಯಾವ್ಹಯಿ ಮನ್ವುನ್ ಆಮ್ಚಾ ಉದ್ದೇಸ್ ನವ್ವ ಆಮಿ ತೇ ಪರೀಕ್ಷೆತ್ ಗಾವ್ತಾತ್ತರಿ ತುಮಿ ಚಾಂಗ್ಲೆತ್ಯ ಕರಾಯಾವ್ಹಯಿ ಮನ್ಯಾಚಾ ಮಾಜಾ ಉದ್ದೇಸ್.

8 ಖರಾಚೆ ಆಡ್ಲೆ ಆಮಿ ಕಾಯ್ ಕರಿತ್ಲಾಹಿ, ಖರ ವಾಡ್ವಾಯಾ ಸಾಟಿ ಸರ್ವ ಕರ್ತಾವ್.

9 ಆಮಿ ಬಳ್ ನಸ್ಲ್ಯಾಲ ಜಾಲಾವ್ತರಿ ತುಮಿ ಬಳ್ ಆಸ್ಲ್ಯಾಲ ಜಾಲ್ಯಾಸಾ ಮನ್ವುನ್ ಸಂತೊಶ್ ವ್ಹತಾವ್; ಹ್ಯ ಜಾಲ್ಯಾವ ತುಮಿ ಸರ್ವ್ಯಾ ಕಾಮಾಸಾಟಿ ಪರಿ ಪುರ್ನ ವ್ಹಯಾ ವ್ಹಯಿಸಾ ಮನ್ವುನ್ ಮಾಗ್ನ್ ಕರ್ತಾವ್.

10 ಹ್ಯಚಿ ಸಾಟಿಸ್ ಮೀ ತುಮ್ಮಿಪ ನಸ್ತಾನಾ ತುಮಾನಾ

ಪಾಡಾಯಾಸಾಟಿ ನವ್ವ ಬಾಂದಾಯಾ ಸಾಟಿಸ್ ಆಲೊಯ್ ಪ್ರಭುನಿ ಮನಾ ದಿಲ್ಯಾಲ್ಯಾ ಹುಕ್ಕಾಣಿ ತುಮ್ಮಿಪ ಆಲೊಕಿ ಕಡಕ್ಕನ್ ದಾವಾಯಾ ಅವ್ವಾಸ್ ರಾಹುನಾಹಿ ಮನ್ವನ್ ಹ್ಯಲಿವೊ.

11 ಸೆವಟ್ಟಿ, ಮಾಯೆಚಾ ಬನ್ನಿಬಾವ್ವಾನು, ಸಂತೊಸ್ ವ್ಹವಾ! ಸುದ್ರಾ, ಧೀರ್ ಗೆವ್ವಾ ಯಕಾ ಮನಾನಿರಾವ್ವಾ ಥಂಡ್‌ಪನಾನಿರಾವ್ವಾ; ತವಾ ಮಾಯೆಚಾ, ಥಂಡ್‌ಪನ್ ಆಸ್ಸಾರಾ ದೇವ್ ತುಮ್ಮೆ ಸಂಗ ರಾನಾರ್.

12 ಪವಿತ್ರ ಮುಕ್ಕಾದಿವುನ್ ಯಕಾಮಕಾಲಾ ಬೊಲ್ವಾ ದೇವಾಚಿ ಲೋಕ ಸಗ್ಳಿ ತುಮಾನಾ ಬುಲಿವ್ತಲ.

13 ದೇವಾಚಿ ಲೋಕ ಸಗ್ಳಿ ತುಮ್ಮಿ ವಂದನ್ ಸಾಂಗ್‌ತ್ಯಾತ

14 ಆಮ್ಚಾ ಪ್ರಭು ಯೇಸು ಕ್ರಿಸ್ತಾಚಿ ಕ್ರಪಾ, ದೇವಾಚಿ ಮಾಯಾ, ಪವಿತ್ರಾತ್ಮಾಚಿ ಯಕಿ ತುಮ್ಮೆ ಸಂಗ. ರಾಹುನಿ.

ದೆವಾಚಿ ಖರಿ ಕಬರ್
The New Testament in the Gowli language of India,
Devanagari script. ದೆವಾಚಿ ಖರಿ ಕಬರ್ (Bible)

copyright © 2023 The Word for the World International and Gowly Marathi Translation Samti, Karnataka

Language: (Gowli)

Contributor: The Word for the World International

ದೆವಾಚಿ ಖರಿ ಕಬರ್
ನವಾ ಕರಾರ್, 2023

The New Testament in Gowli Marathi Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

c4461ecc-9ab5-5edc-b62d-034ac186b922